


兩漢博聞
三





兩漢博聞

(三)

楊侃編

編主五雲王

編初成集書叢

聞 博 漢 兩
冊 三

中華民國二十五年六月初版

編者 楊 侃

發行人 王 雲 五
上海河南路

印刷所 商 務 印 書 館
上海河南路

發行所 商 務 印 書 館
上海及各埠

詳



兩漢博聞卷第八

大駕。法駕。小駕。輿服志二十九。

胡廣漢制度曰：天子出有大駕、法駕、小駕、大駕，則公卿奉引，大將軍驂乘，太僕御屬車八十一乘，備千乘萬騎。法駕，八卿不在鹵簿，唯河南尹、執金吾、洛陽令奉引，侍中驂乘，奉車郎御屬車四十六乘，小駕，太僕奉駕，侍御史整車騎也。

文始五行武德之舞。顯宗紀

永平三年，烝祭光武廟，初奏文始五行武德之舞。

注云：禮記曰：冬祭曰烝，烝，衆也。冬物畢成，可祭者衆。前書曰：文始舞者，本舜韶舞也。高祖六年，更名文始，其舞人執羽籥五行者，本周舞也。秦始皇二十六年，更名五行，其舞人冠冕衣服，法五行色。武德者，高祖四年作，言行武以除亂也。其舞人執干戚。光武草創禮樂未備，今始奏之。

三老五更。顯宗紀永平一年。

詔曰：光武皇帝建三朝之禮，而未及臨饗，眇眇小子，初行大射，復踐辟雍，尊事三老，兄事五更，三老李躬，年者學明，五更桓榮，授朕尚書，其賜榮爵關內侯，三老五更皆以二千石祿養，終厥身。

注云：三朝之禮，謂明堂、辟雍、靈臺也。安車，坐乘之車，輓輪以蒲，裹輪輓而堯反。三老就車，天子親執

綏授之綏車中把也。漢官儀曰：三老五更皆取有首妻男女全具用，其德行年耆高者。三公一人爲三老，次卿一人爲五更，皆冠進賢扶玉杖。其日乘輿先到辟雍，遣使者安車迎三老五更。天子迎于門屏，交拜。三公設几杖，九卿正履。天子親袒割俎，執醬而饋，執爵而醕。五更南面，三公進供，禮亦如之。醬醕也。

橫吹 班超傳三十七。

拜班超爲將兵長史，假鼓吹幢麾。

注云：古今樂錄曰：橫吹，胡樂也。張騫入西域，傳其法於長安，唯得摩訶兜勒一曲。李延年因之，更造新聲二十八解，乘輿以爲武樂。後漢以給邊將，萬人將軍得之。在俗用者，有黃鵠隴頭、出關、入關、出塞、入塞、折楊柳、黃覃子，亦之楊。望行人十曲，橫吹幢麾皆大將軍所有。超非大將，故言假。

小侯學 顯宗紀永平九年。

爲四姓小侯開立學校，置五經師。

注云：袁宏漢紀曰：爲外戚樊氏、郭氏、陰氏、馬氏諸子弟立學，號四姓小侯，以非列侯，故曰小侯。

清宮 楊秉傳四十四 漢前文帝紀附。

王者至尊，警蹕而行，靜室而止。

注云：蹕，止行人也。靜室，謂先使清宮也。

文帝卽位使太僕嬰東車侯與居先清宮。

應劭曰舊典天子行幸所至必遣靜室今先案行清靜殿中以虞非常。

三鱣楊震傳四十四

有冠雀銜三鱣魚飛集楊震講堂前都講取魚進曰蛇鱣者卿大夫服之象也數三者法三台也先生自此升矣。

注云冠音貫卽鸛雀也鱣音善鱣似蛇臣賢案續漢及謝承書鱣字皆作鱣然則鱣鱣古字通也黃地黑文故云卿大夫服象也。

三互蔡邕傳五十下

初朝議以州郡相黨人情比周乃制婚姻之家及兩州人士不得對相監臨至是復有三互法三互謂婚姻之家兩州人不得交互爲官也。

鯨魚杵蒲牢班固傳三十下前漢楊雄傳附

班固東都賦云發鯨魚鏗華鍾登玉輅乘時龍。

注云鯨魚杵謂刻杵作鯨魚形也鏗謂擊之也薛綜注西京賦云海中有大魚名鯨又有獸名蒲牢素畏鯨魚鯨魚擊蒲牢蒲牢輒大嗚呼凡鐘欲令其聲大者故作蒲牢於其上撞鐘者名爲鯨魚鐘有篆刻之文故曰華。

楊雄河東賦鳴洪鐘。

師古曰天子將出則撞黃鐘之鐘左五鐘皆應入則撞蕤賓之鐘右五鐘皆應。

周廬千列班固傳三十上。

注云宿衛之廬周於宮也千列言多也。

鉤陳班固傳。

周以鉤陳之位衛以嚴更之署。

注云周環也鉤陳紫宮外星也宮衛之位亦象之嚴更之署行夜之司也。

尺一詔李雲傳四十七 陳蕃傳五十六。

李雲書曰尺一拜用不經御省。

注云尺一之版謂詔策也。

陳蕃疏曰尺一選舉宜委尚書三公。

注云尺一謂板長尺一以寫詔書也。

肉刑郎顛傳二十下。

注云漢法肉刑三謂黥也劓也左右趾也文帝除之當黥者髡鉗城旦舂當劓者笞三百當左右趾

者笞五百。

輦車驪駕。

光武北征軍食急乏寇恂守河內以輦車驪駕轉輸前後不絕。

注云驪駕併駕也輦車人挽行也。

風角郎顛傳

郎顛學京氏易善風角星算。

注云京氏京房也作易傳風角謂侯四方四隅之風以占吉凶也星算謂天文算數也。

道家蓬萊山寶章傳十三

學者稱東觀爲老氏藏室道家蓬萊山。

注云老子爲守藏史復爲柱下史四方所記文書皆歸柱下言東觀經籍多也蓬萊海中神山爲仙府幽經祕錄皆在焉。

中書伏湛傳十六

永和元年詔伏無忌與議郎黃景枝定中書五經諸子百家藝術。

注云中書內中之書也。

名馬式馬援傳十四

馬援善別名馬於交趾得駱越銅鼓乃鑄爲式還上之因表曰臣援常師事楊子阿受相馬骨法今欲

形之於生馬。則骨法難備具。孝武時。善相馬者東門京。東門姓也。京名也。鑄作銅馬法獻之。有詔立馬於魯班門外。則更名魯班門為金馬門。臣謹依儀氏等數家骨相以為法。有詔置於宣德殿下。以為名馬式。馬服君。馬援傳。

馬援。其先趙奢為將。號曰馬服君。子孫因為氏。

注云。馬服者。言能服馭馬也。史記曰。趙惠文王以奢有功。賜爵號馬服君。

汗簡。吳祐傳五十四。

吳祐父恢為南海太守。到官。恢欲殺青簡以寫經書。諫止之。

注云。殺青者。以火炙簡。令汗取其青。易書。復不蠹。謂之殺青。亦謂汗簡。

帝者諱也。李雲傳。

孔子曰。帝者諱也。

注云。審諱於物也。

治所。前漢朱博傳。

師古曰。刺史所止理事處。

黃綬。朱博傳。

師古曰。縣丞尉職卑。皆黃綬。

閒步。朱博傳。

朱博去吏閒步至廷尉下，雪陳咸事。

師古曰：去吏自解職也。閒步，謂步行而伺閒隙以去。

束脩之饋。第五倫傳三十一。

大夫無境外之交，束脩之饋。

注云：束脩，束帛也。脩，脯也。饋，遺也。

司馬法。孔融傳。

注云：齊威王使大夫追論古者司馬法，其法論田及兵之法也。

三閭。孔融傳。

注云：卽屈原也。掌王族三姓，曰昭、屈、景，故曰三閭。

鼓行。荀彧傳六十。

鼓行而前。

注云：謂鳴鼓而行，言無所畏也。

人品。郭泰傳五十八。

郭泰獎拔士人，皆如所鑒。

注云謝承書云秦之所名人品乃定先言後驗衆皆服之。

角立傑出徐稭傳四十三

桓帝徵徐稭姜肱等並不至帝問陳蕃曰徐稭等孰爲先後蕃曰稭爰自江南卑薄之域角立傑出宜當爲先。

注云如角之特立也。

國憂。

奔國憂又曰來弔大憂。

禁民二業劉般傳二十九

劉般上言曰郡國以官禁二業至有田者不得漁捕。

注云二業謂農者不得商賈也。

琴增二絃仲長統傳三十九

注云三禮圖曰琴本五絃曰宮商角徵羽文王琴增曰少宮少商絃最清也。

去符傳寶固傳十三

寶固出玉門擊西域詔耿秉及騎都尉劉張皆去符傳以屬固。

注云專將兵者並有符傳擬合之取信今去符傳皆受固之節度。

清詔第五倫傳三十一

第五倫永壽中以司徒掾清詔使冀州廉察災害舉奏刺史二千石以下

注云風俗通曰汝南周勃辟太尉清詔使荊州又此言以司徒清詔使冀州蓋三公府有清詔員以承詔使也

去就之槩周燮傳序四十三

識去就之槩

注云槩節也候時以居不失去就也

前星廣陵思王傳三十二

注云天官書曰心前星太子之位也

征營鍾離意傳三十一

鍾離意上疏曰不勝愚贖征營罪當萬死

注云征營不自安也

當陽侯清河孝王傳四十五

注云當陽今荊州也

北寺獄千乘貞王傳

北寺獄名。屬黃門署。前書音義曰。卽若盧獄也。

通儒俗儒。儒林傳十七。

注云。風俗通曰。儒者區也。言其區別古今。居先王之制。立當時之事。此通儒也。若能言而不能行。講誦而已。無能往來。此俗儒也。

伎數。桓譚傳十八。

小才伎數之人。

注云。伎。方伎。醫方之家也。數。謂數術。史卜之官也。

奏記。班固傳三十上。

班固奏記於東平王蒼。

注云。奏。進也。記。書也。前書待詔鄭朋奏記於蕭望之。奏記自朋始也。

搜牢。董卓傳六十二。

董卓既行廢立之事。是時洛中金帛。家家殷積。卓縱放兵士。剽虜資物。謂之搜牢。

注云。言牢固者。皆搜索取之也。

叟兵。董卓傳。

呂布軍有叟兵。內反。引李傕入城。

注云。叟兵則蜀兵也。漢代謂蜀爲叟。

百六有會。董卓傳贊。

百六有會。過剝成災。

注云。前書音義曰。四千五百歲爲一元。一元之中有九度。陽厄五。陰厄四。陽爲旱。陰爲水。初入元。百六歲有陽厄。故曰百六之會。

郾塢。南北塢。董卓傳。獻帝紀。皇甫規傳。

董卓築塢於郾。高厚七丈。號曰萬歲塢。積穀爲三十年儲。自云。事成雄據天下。不成守此足以畢老。既敗。塢中珍藏。有金二三萬斤。銀八九萬斤。錦綺紈素奇玩。積如邱山。

李催移獻帝幸北塢。

注云。營居曰塢。一曰庫城。時帝在南塢。催迎帝幸北塢。字林曰。塢。小障也。一曰小城。字或作隴。

皇甫規傳。覆沒營塢。鄆音烏古反。

鮮車怒馬。第五倫傳三十一。

第五倫爲蜀郡太守。蜀地肥饒。掾史家貲多至千萬。皆鮮車怒馬。以財貨自達。倫悉寵遣之。更選孤貧志行之人。以處曹任。

注云。怒馬。謂馬之肥壯。其氣憤怒也。

服練紅。東海恭王傳三十二。

宗室東海孝王臻兄弟並有篤行。母卒，皆吐血毀瘠。至服練紅，兄弟追念初喪父，幼小哀禮有闕，因復重行喪制。

注云：既祥之後，而服練也。禮記曰：練衣黃裏，纁緣，纁淺絳也。

八月賜羊酒。鄭均傳十七。

鄭均爲尚書，以病乞骸骨，拜議郎，告歸。元和元年詔曰：鄭均前在機密，以病致仕，守善貞固，黃髮不怠。其賜均穀千斛，常以八月長吏存問，賜羊酒，顯茲異行。

注云：東觀記曰：賜羊一頭，酒二斗，終其身。問遺賢良，必以八月。諸物老成，故順其時氣，助養育之也。

三關。馮衍傳十。

上黨之地，有四塞之固，東帶三關，西爲國蔽。

注云：三關，謂上黨關、壺口關、石陘關也。陘，音形。

天心。郎顛傳二十。

注云：李巡曰：北極居天心也，居北方正四時，謂之北辰也。

傳國璽。徐璆傳三十八。

徐璆道爲袁術所劫，術死軍破，璆得其盜國璽，還許上之。

注云衛宏曰秦以前以金玉銀爲方寸璽秦以來天子獨稱璽又以玉羣下莫得用其玉出藍田山題是李斯書其文曰受命于天既壽永昌號曰傳國璽漢高祖定三秦子嬰獻之高祖卽位乃佩之王莽就元后求璽后乃出以投地上螭一角缺及莽敗李松送上更始更始上赤眉建武三年盆子奉以上光武孫堅入雒敗董卓軍於城南見井中有五色光堅乃浚井得璽袁術拘堅妻求之得璽舉以向肘時珍得而獻之

紫微宮霍謂傳三十八

注云天有紫微宮是上帝所居也王者立宮象而爲之也

飛書梁松傳二十四

梁松怨望乃縣飛書誹謗下獄死

注云飛書者無根而至若飛來也卽今匿名書也

伊優抗髒趙壹傳七十下

趙壹詩云伊優北堂上抗髒倚門邊

注云伊優屈曲佞媚之貌抗髒高抗偉直之貌也佞媚者見親故昇堂偉直者見棄故倚門

彈碁梁冀傳二十四

梁冀能挽滿彈碁格五六博蹴鞠意錢之戲挽滿猶引強也

注云藝經曰彈碁兩人對局白黑碁子各六枚先列碁相當更先彈也。

格五梁冀傳 吾邱壽王傳三十四附

注云前書吾邱壽王善格五音義云簏也蘇代反說文曰行碁相塞謂之簏鮑宏簏經曰簏有四采塞四乘五是也至五卽格不得行故謂之格五。

六博梁冀傳

注云鮑宏博經曰用十二碁六碁白六碁黑所擲頭謂之瓊瓊有五采按莊子云博塞以遊注云行五道而投瓊曰博不投瓊曰塞塞亦博類。

意錢梁冀傳 王符傳三十九

注云何承天纂文曰詭億一曰射意一曰射數卽攤錢也。

王符潛夫論曰或以遊博持掩爲事。

注云博謂六博掩謂意錢也。

蹴鞠梁冀傳

注云劉向列傳曰蹴鞠者傳言黃帝所作或曰起戰國之時蹴鞠兵勢也所以講武知有材也。

步驟曹襄傳三十五

詔曰三五步驟優劣殊軌。

注云孝經鉤命決曰三皇步五帝驟三王馳

掾屬蓋延傳八

蓋延身長八尺彎弓三百斤邊俗尚勇力延以氣聞歷郡列掾州從事

注云古者三公下至郡縣皆有掾屬續漢志曰建武十八年立刺史十三人入主一州皆有從事史假佐每郡皆置諸曹掾郡中列掾非一延並爲之故言歷也

甲乙科射策順帝紀陽嘉元年

注云前書音義曰甲乙科謂作簡策難問列置案上在試者意投射取而答之謂之射策上者爲甲次者爲乙若錄政化得失顯而問之謂之對策

三獨坐王常傳五

注云漢官儀曰御史大夫尚書令司隸校尉皆專席號三獨坐

景風和帝永元三年

和帝詔曰高祖功臣蕭曹爲首曹相國後容城侯無嗣宜求近親須景風紹封以章厥功

注云春秋考異郵曰夏至四十五日景風至則封有功

閒氣郎顛傳二十下

郎顛曰處士漢中李固元精所生王之佐臣天之生固必爲聖漢

注云元爲天精。謂之精氣。春秋演孔圖曰。正氣爲帝。閒氣爲臣。宮商爲佐。秀氣爲人也。

三統陳寵傳三十六

冬至之節。陽氣始萌。故十一月有蘭射干芸荔之應。天以爲正。周以爲春。十二月。陽氣上通。雉雛雞乳。地以爲正。殷以爲春。十三月。陽氣已至。天地已交。人以爲正。夏以爲春。三微成著。以通三統。周以天元。殷以地元。夏以人元。若以此時行刑。則殷周歲首皆當流血。不合人心。不稽天意。

百戶牛酒。肅宗紀元和二年。

詔賜河南女子百戶牛酒。

注云。史記封禪書。百戶牛一頭。酒十石。臣賢謂女戶頭。卽今之女戶也。天子稱慶。恩當普洽。所以男戶賜爵。女子賜牛酒。

駭雞犀。西域大秦國傳七十八。

注云。抱朴子曰。通天犀。有白理如綆者。以盛米。置羣雞中。雞欲往啄米。至輒驚卻。故南人名爲駭雞。

設屏。齊王縝傳四。

人君正屏。有所不聽。

注云。白虎通曰。所以設屏。何以自障也。示不極臣下之敬也。天子德大。故外屏。諸侯德小。故內屏。

重繭。段熲傳五十五。

段熲與東羌戰。羌大敗。棄兵而走。追之三日三夜。士皆重繭。

注云。繭。足下傷起形如繭也。淮南子曰。申包胥曾繭重貳。

樞機。明德馬皇后傳十。

先帝防慎舅氏。不令在樞機之位。

注云。樞機。近要之官也。

太后臨朝。安思閹皇后傳十下。

注云。蔡邕獨斷曰。少帝即位。太后即代攝政。臨前殿。朝羣臣。太后東面。少帝西面。羣臣奏事上書。皆

為兩通。一詣后。一詣少帝。

關覽。張升傳七十下。

張升少好學。多關覽。而任情不羈。

注云。關。涉也。不羈。謂超絕等倫不可羈束也。

柱天。齊王縝傳四。

齊王縝自稱柱天都部。

注云。柱天者。若天之柱也。

匿犀。李固傳五十三。

李固貌狀有奇表，鼎角匿犀，足履龜文。

注云：鼎角，頂有骨如鼎足也。匿犀，伏犀也。謂骨當額上入髮際隱起也。足履龜文者，二千石見相書。

僧牛逢萌傳七十三。

王君公僧牛自隱。

注云：口無二價。時人曰：避世牆東王君公，僧謂平會兩家賣買之價。

角力，隗囂傳三。

注云：角力，爭力也。

慰藉，隗囂傳。

隗囂上書詣闕，光武素聞其風聲，報以殊禮，言稱字，用敵國之儀，所以慰藉之良厚。

注云：慰，安也。藉，薦也。言安慰而薦藉之良甚也。

囊弓臥鼓，隗囂傳。

注云：臥，猶息也。

章鉞，李固傳五十三。

李固誅弟子汝南郭亮，年始成童，遊學洛陽，乃左提章鉞，右秉鉄鎖，詣闕上書，乞收固屍，不許。

注云：章，謂所上章也。鉞，斧也。鉄鎖，鑊也。

懸師皇甫規傳五十五

皇甫規上疏乞自効懸師之費且百億計

注云懸猶停也

銀艾張奐傳五十五

張奐曰吾前後仕進十要銀艾

注云銀印綠綬也以艾草染之故曰艾也

晏開耿國傳九

使塞下無晏開之警

注云有警急則開門晚也

鐵券祭遵傳十

丹書鐵券傳於無窮

注云鐵券鐵契也前書高祖與功臣剖符作誓丹書鐵契

中藏蓋勳傳四十八

帝曰吾多出中藏財物以餌士何如

注云中藏謂內藏也

元元光武紀

注云元元謂黎庶也前書武帝詔勸元元師古曰元元善意

左官丁鴻傳二十七

丁鴻上封事曰左官外附之臣依託權門

注云左官者人道尙右舍天子而事諸侯爲左官外附謂背正法而附私家

韋帶周磐傳二十九

周磐解韋帶就孝廉之舉

注云以韋皮爲帶未仕之服也求仕則服革帶故解之

殊死光武紀一上

光武詔罪非犯殊死一切勿案

注云殊死謂斬刑殊絕也左傳曰斬其木而弗殊一切謂權時非久制也

史書安帝紀五

安帝年十歲好學史書

注云史書者史籀所作凡五十五篇可以教童幼

生犀肅宗紀元和元年

南徼外蠻夷獻生犀白雉

注云山海經曰犀似牛而豬頭黑色交州記曰犀有毛如豕頭如馬有三角鼻上角短額上頭上角長異物志曰角中特有光耀白理如線自本達末則爲通犀

六幽肅宗紀章和元年

光照六幽

注云六幽謂六合幽隱之處


廊廟之計申屠剛傳十九

注云廊殿下屋也廟太廟也國事必先謀於廊廟之所也

從官前漢元帝紀附

永光五年秋潁川水出流殺人民吏從官縣被害者與告

晉灼曰從官卽上侍從之官也言凡爲吏爲從官其本縣有被害者皆與休告



兩漢博聞卷第九

六璽。光武紀建武三年。

赤眉君臣面縛奉光武以高帝璽綬。

注云蔡邕獨斷曰皇帝六璽皆玉螭虎紐文曰皇帝行璽皇帝之璽皇帝信璽天子行璽天子之璽天子信璽皆以武都紫泥封之玉璽譜曰傳國璽是秦始皇初定天下所刻。

通中枕。鍾離意傳三十一。

注云蔡質漢官儀曰尚書郎直入臺中官供新青縑白綾被晝夜更宿帷帳晝通中枕臥旃蓐冬夏隨時改易太官供食五日一美食下天子一等。

方領。馬援傳十四。

注云前書音義曰頸下施衿領正方學者之服也。

鹿車。趙意傳十六。

趙熹避赤眉兵以泥塗友人韓仲伯婦面載以鹿車。

注云風俗通曰鹿車窄小載容一鹿。

文降。皇甫規傳五十五。

中外共誣皇甫規貨賂羣羌令其文降。

注云以文簿虛降非真心也。

重問王襲傳四十六

舊典大臣不有大罪不至重問。

注云大臣獄重故曰重問成帝時丞相薛宣御史大夫翟方進有罪上使五二千石雜問音義曰大獄重故以秩二千石五人同問之。

柴信竇武傳五十九

取柴信閉諸禁門。

注云柴有衣戟也漢官儀曰凡居宮中皆施籍於掖門案姓名當入者本官爲封柴傳審印信然後受之。

回冗盧植傳五十四

植上書曰今之禮記特多回冗。

注云回冗紆曲也。

投閒延篤傳五十四

延篤書曰百家衆氏投閒而作。

注云言誦經典之餘。投射閒隙。而翫百氏也。

糝。盧植傳。

植書云。周禮諸經。發起糝謬。

注云。糝。粟不成。喻義之乖僻也。

閔闕。章帝紀。

詔曰。每尋前世舉人貢士。或起訕畝。不擊閔闕。

注云。明其等曰。閔。積其功曰闕。言務取賢才。不拘門地。

嬰城。卓茂傳十五。

嬰城者相望。

注云。言以城自嬰繞。

油戟。杜詩傳二十一。

杜詩。歲中三遷。爲侍御史。世祖召見。賜以檠戟。

注云。漢雜事曰。漢制假檠戟。以代斧鉞。崔豹古今注曰。檠戟。前驅之器也。以木爲之。後代以赤油韜。

之。亦謂之油戟。王公已下通用之。

紫艾綬。馮飭傳二十三。

獲嘉侯馮石安帝寵之賜紫艾綬。

注云艾卽整綠色也其色似艾。

兼兩吳祐傳五十四。

吳祐諫其父欲殺青簡以寫經書曰此書若成則載之兼兩。

注云車有兩輪故稱兩也。

骨鯁來欽傳五。

注云骨鯁喻正直也說文曰鯁魚骨也食骨留咽中爲鯁。

奕世楊秉傳四十四。

楊秉疏曰臣奕世受恩。

注云奕猶重也。

龜鼎宦者傳六十八。

宦者論云魏武因之遂遷龜鼎。

注云龜鼎國之守器以喻帝位也。

竹帛和熹鄧皇后傳十。

注云竹謂簡冊帛謂縑素。

鍛鍊章彪傳十六

鍛鍊之吏持心近薄。

注云鍛椎也。鍛鍊成熟也。言深文之吏入人之罪。猶工冶陶鑄鍛鍊使之成熟也。

時髦。

注云髦俊也。郭璞云士中之俊猶毛中之髦。

保阿傅士順帝紀贊

注云保安也。阿倚也。言可依附以取安。傅姆之類也。傅士謂阿母山陽君宋娥更相貨賂求增邑士也。

五營順帝紀

注云五營五校也。謂長永步兵射聲胡騎車騎等五校尉。

仙人山圖西南夷傳七十六

荜都夷者武帝開之。士出長年神藥。仙人山圖所居焉。

注云劉向列仙傳曰山圖隴西人好乘馬。馬蹠折脚。山中道士教服地黃。當歸羌活。玄參。服一年不嗜食。病愈身輕。道士自云五岳使人之名山採藥能隨吾。汝便不死。山圖隨之。莫知所終。

晨門王襲傳論四十六

晨門有抱關之夫。

注云晨主守門晨夜開閉也。史記侯嬴夷門抱關者守門必抱關故兼言之。

環玦袁譚傳六十四下。

審配上書袁譚曰願將軍熟詳吉凶以賜環玦。

注云絕人以玦反人以環。

峭覈第五倫傳論三十一。

第五倫峭覈爲方。

注云峭覈謂其性峻急好窮覈事情。

露布李雲傳四十七。

李雲素剛憂國將危乃露布上書移副三府。

謹案三府二字原本誤提行今更正書內此類不復一一注出

注云露布謂不封之也并以副本上三公府也。

白越明德馬皇后傳十。

馬太后賜諸貴人白越三千端。

注云白越越布也。

跋扈朱浮傳二十三

注云跋扈猶暴橫也。又梁冀傳注跋扈猶強梁也。

東園梓器夏皇后傳十下

夏皇后崩斂以東園畫梓壽器。

注云東園署名屬少府掌爲棺器梓木爲棺以漆畫之稱壽器者欲其久長也。猶如壽宮壽陵之類也。大臣薨亦多賜東園祕器。

采女鄧皇后傳

鄧皇后少入掖庭爲采女絕幸。

注云采擇也因采擇而立名。

富於春秋樂恢傳三十三

注云春秋謂年也言年少春秋尙多故稱富。

姑息朱穆傳三十三

注云姑且也息安也小人之道苟且取安也。

梗槩杜篤傳七十

杜篤曰臣所欲言陛下已知故略其梗槩。

注云梗槩猶粗略也。

髻亂邊讓傳七十下。

注云髻剪髮為髻也。亂毀齒也。大戴禮曰男八歲而髻女七歲而亂。

巨萬鄧皇后傳十下。

賞賜巨萬計。

注云巨大也大謂萬萬也。

轉張董皇后傳十下。

汝今轉張怙汝兄邪。

注云轉張猶彊梁也。

府帑鄧訓傳六。

注云帑金帛所藏之府。

稽故鄧訓傳。

擁衛稽故令不得戰。

注云稽故謂稽留事故也。

註誤光武紀。

注云。註亦誤也。音桂。

浮屠。楚王英傳三十二。

注云。袁宏漢記。浮屠。佛也。西域天竺國有佛道焉。佛者。漢言覺也。將以覺悟羣生也。初明帝夢見金人。長大。頂有日月光。以問羣臣。或曰。西方有神。其名曰佛。陛下所夢。得無是乎。於是遣使天竺。問其道術。而圖其形像焉。

伊蒲塞。桑門。仁祠。楚王英傳三十二。

顯宗詔。天下死罪。皆入縑贖。楚王英奉黃縑白紬。三十四贖罪。下詔曰。楚王誦黃老之微言。尚浮屠之仁祠。何嫌何疑。當有悔吝。其還贖。以助伊蒲塞桑門之盛饌。

注云。伊蒲塞。卽優婆塞也。中華翻爲近住。言受戒行。堪近僧住也。桑門。卽沙門也。神道。中山簡王傳三十二。

中山簡王薨。詔大爲修冢塋。開神道。

注云。墓前開道。建石柱以爲標。謂之神道。

刀筆。劉盆子傳。

注云。古者記事於簡冊。謬誤者以刀削而除之。故曰刀筆。

輕車。楊賜傳四十四。

注云續漢書輕車古之戰車也。雕朱輪輿，不巾不蓋，苗矛戟幢麾，苗側事反，謂插也。

伍伯，曹節傳六十八。

騎營五百。

注云，韋昭辯釋名曰：五百，字本爲伍伯，伍當也。伯，道也。使之導引當道陌中，以驅除也。案今俗呼行杖人爲五百也。

充庭車，安帝紀。

永初四年正月元日，會徹樂，不陳充庭車。

注云，每大朝會，必陳乘輿法物車，葢於庭，故曰充庭車也。以年飢，故不陳。

口賦，光武紀。

注云，漢儀注曰：人年十五至五十六，出賦錢，人百二十爲一算。又七歲至十四，出口錢，人二十，以供天子。至武帝時，又口加三錢，以補車騎馬。

旄頭騎，光武紀。

注云，漢官儀曰：舊選羽林爲旄頭，被髮先驅。魏文帝列異傳曰：秦文公時，梓樹化爲牛，以騎擊之，騎不勝，或墮地，髻解被髮，牛畏之入水。故秦因是置旄頭騎，使先驅。

長檄，安帝紀。

民訛言相驚窮困道路若欲歸本郡在所爲封長檄。

注云印封之也。長檄猶今長牒。欲歸者皆給以長牒爲驗。

葆車光武紀

注云葆車謂上建羽葆也。合聚五采羽名爲葆。

烽燧光武紀

注云邊方備警急作高土臺臺上作桔皋。桔皋頭有兜零以薪草置其中有寇即燃火相告曰烽。又多積薪寇至即燔之望其烟曰燧。晝則燔燧夜乃舉烽。兜零籠也。

同門學張酺傳三十五

注云張酺從祖父充與光武同門學。光武卽位求問充充已死。又前漢孟喜傳注云同門同師學者也。

甄表門閭

甄表門閭旌顯厥行

注云甄明也旌章也。里門謂之閭旌表者若今樹闕而顯之。

苛政光武紀

注云說文曰苛小草也言政令繁細。

羽檄光武紀

注云魏武奏事云若有急即插以雞羽謂之羽檄

三河光武贊

注云河南河北河東也

殿最光武紀

注云殿後也謂課居後也最凡要之首言課居先也

鉗鈇光武紀

建武二十二年詔赦徒皆弛解鉗衣絲絮

注云弛解脫也鈇足鉗也徒計反又大蓋反在徒役者不得衣絲絮今赦許之

輿地圖光武紀

注云廣雅曰輿載也言載在地者皆圖書之

制詔光武紀

注云漢制度曰帝之下書有四一曰策書二曰制書三曰詔書四曰誡敕

赤草光武紀

中元元年赤草生於水崖

幕南光武紀。
注云赤草朱草也。大戴禮曰朱草日生一葉至十五日已後日落一葉周而復始。

匈奴北徙幕南地空。

野穀旅生光武紀。

注云旅寄也不因播種而生故曰旅。

亭候光武紀。

注云亭候伺候望敵之所。前書曰秦法十里一亭亭有長漢因之不改。

牙門袁紹傳六十四上。

麴義乘勝到公孫瓚營拔其牙門。

注云真人水鏡經曰凡軍始出立牙竿必令完整若有折將軍不利。牙門旗竿軍之精也。卽周禮軍旅會同置旗門是也。

衿帶杜篤傳七十。

關梁之險多所衿帶。

注云衿帶衣服之要故以喻之。

閒關荀彧傳論六十。

荀君乃越河冀開關以從曹氏。

注云開關猶展轉也。又前書王邑戰敗馳入宮開關至漸臺。注云開關猶言崎嶇展轉也。

投纆吳祐傳五十四

投纆而死。

注云謂以繩爲纆投之而縊也。纆胡犬反。

庶孽杜喬傳五十三

注云孽賤也。猶樹之有孽生也。

大較延篤傳五十四

注云較猶略也。

輜重光武紀

注云釋名曰輜廁也。謂軍糧什物雜廁載之。以其累重故稱輜重。重直用反。

屠唐鄉光武紀高帝紀注附

光武進屠唐子鄉。

注云多所誅殺曰屠。唐子鄉地名。

師古曰屠謂破取城邑誅其人如屠六畜然。

中堅光武紀

衝其中堅

注云凡軍事中軍將最尊居中以堅銳自輔故曰中堅

雲車光武紀

注云雲車卽樓車稱雲言其高也升之以望敵猶公輸般爲雲梯之械

武關山爲地門劉盆子傳

注云武關在今商州上洛縣東河圖括地象曰武關山爲地門上爲天齊星下爲文宿辰

樓車光武紀

或爲地道衝輞撞城

注云衝輞車也輞樓車也

面縛光武紀

注云面偕也謂反偕而縛之

占書袁敞傳三十五

張俊自獄中占獄吏上書自訟

注云占謂口授也前書陳遵憑几口占書吏是也

盤孟銘。朱穆傳三十三。

古之明君必有輔德之臣。規諫之官。下至器物。銘書成敗。以防遺失。

注云。黃帝作巾机之法。孔甲有盤孟之誠。太公陰謀曰。武王衣之銘曰。桑蠶苦。女工難。得新捐故。後必寒。鏡銘曰。以鏡自照者見形容。以人自照者見吉凶。觴銘曰。樂極則悲。沈湎致非。社稷爲危也。

章奏。胡廣傳三十四。

注云。周成雜字曰。牋表也。漢雜事曰。凡羣臣之書通於天子者四品。一曰章。二曰奏。三曰表。四曰駁議。章者需頭。稱稽首上以聞。謝恩陳事詣闕通者也。奏者亦需頭。其京師官但言稽首言。下稽首以聞。其中有所請。若罪法効案。公府送御史臺。卿校送謁者臺也。表者不需頭。上言臣某言。下言誠惶。誠恐頓首頓首死罪死罪。左方下附曰。某官臣甲乙上。

嚴棘。寇榮傳六。

尙書背繩墨。案空劾。不復質确其過。寘於嚴棘之下。

注云。質。正也。确。實也。若角反。嚴棘。謂獄也。易曰。繫用徽墨。寘于叢棘。

珠畫祕器。袁安傳三十五。

袁逢卒。賜以珠畫特詔祕器。

注云。前書。董賢死。以沙畫棺。音義云。以朱沙畫之也。珠與朱同。祕器。棺也。董賢傳。沙畫棺。以朱砂塗。

之而又雕畫也。

賜胙鄧彪傳三十四

注云胙祭廟肉也禮凡預祭異姓則歸之胙同姓則留之宴不預祭而賜胙重之也。

江沔荀彧傳六十

注云沔卽漢水也孔安國曰漢上爲沔。

酒罏孔融傳六十

注云罏累土爲之以居酒瓮如鍛鑪故名罏字或作壚。

縣廷郭太傳五十八

郭太早孤母欲使給事縣廷。

注云蒼頡篇曰廷直也說文廷朝中也風俗通云廷正也言縣廷郡廷朝廷皆取平均正直也。

梁益獻帝紀

建安十八年復禹貢九州。

注云兗豫青徐荆揚冀益雍也九數雖同而禹貢無益州有梁州然梁益亦一地也前漢武帝置十

三部刺史改雍曰梁改梁曰益。

喉舌之官李固傳五十三

李固曰。陛下之有尚書。猶天之有北斗也。斗爲天喉舌。尚書亦爲陛下喉舌。斗斟酌元氣。運平四時。尚書出納王命。賦政四海。賦布也。

注云。春秋合誠圖曰。天理在斗中。司三公。如人喉在咽。以理舌語。宋均曰。斗爲天之舌口。主出政教。三公主導宣君命。

兩漢博聞卷第十

金馬碧雞西南夷傳九十六前漢王褒傳

越巂郡青蛉縣禹同山有碧雞金馬光景時時出見

注云禹同山在今襄州揚波縣王褒碧雞頌曰持節使王褒謹拜南崖敬移金精神馬縹碧之雞處南之荒深谿回谷非土之鄉歸來歸來漢德無疆廉平唐虞澤配三皇華陽國志曰碧雞光景人多見之前書音義曰金形似馬碧形似雞也

方士言益州有金馬碧雞之寶可祭祀致也宣帝使褒往祀焉褒於道病死

火毳西南夷傳

注云火毳卽火浣布也神異經曰南方有火山長四十里廣四五里生不燼之木晝夜火燃得烈風不猛暴雨不滅火中有鼠重百斤毛長二尺餘細如絲常居火中時時出外而色白以水逐沃之卽死績其毛織以作布用之若汗以火燒之則清潔也傅子曰長老說漢桓時梁冀作火浣布單衣會賓客行酒公卿朝臣前佯爭酒失杯而汗之冀僞怒解衣燒之布得火燂然而熾如燒凡布垢盡火滅粲然潔白如水滌也

虎魄枕西南夷傳

注云廣雅曰虎魄生地中其上及旁不生草深者八九尺大如斛削去皮成虎魄如斗初時如糖膠凝堅乃成其方人以爲枕出屬賓及大秦國博物志曰松脂淪入地千年化爲茯苓茯苓千歲化爲虎魄今太山有茯苓而無虎魄永昌有虎魄而無茯苓

猩猩西南夷傳

注云酈元水經注曰猩猩形若狗而人面頭顏端正善與人言音聲妙麗如婦人對語聞之無不酸楚南中志曰猩猩在山谷中行無常路百數爲羣土人以酒若糟設於路又喜羸子土人織草爲屨數十量相連結猩猩在山谷見酒及屨知其設張者卽知張者先祖名字乃呼其名而罵云奴欲張我捨之而去去而又還相呼試共嘗酒初嘗少許又取羸子著之若進兩三升便大醉人出收之羸子相連不得去執還內牢中人欲取者到牢邊語云猩猩汝可自相推肥者出之旣擇肥竟相對而泣卽左思賦云猩猩啼而就禽者也昔有人以猩猩餉封溪令人問餉何物猩猩自於籠中曰但有酒及僕耳無他飲食

鈎黨史弼傳五十四

注云鈎謂相連也又靈帝紀注鈎謂相牽引也

河潼傳贊五十五

注云潼谷名谷有水曰潼水卽潼關

貊獸西南夷傳

注云南中八郡志曰貊大如驢狀頗似熊多力食鐵所觸無不拉廣志曰貊色蒼白其皮温煖

蚌珠西南夷傳

注云徐衷南方草物狀曰凡採珠常三月用五牲祈禱若祠祭有失則風攪海水或有大魚在蚌左右蚌珠長三寸半凡三品珠也

枕榔麩西南夷傳

牂牁句町縣有枕榔木可以爲麩百姓資之牂牁卽夜郎也楚項襄王遣將莊豪滅夜郎改其名爲牂牁

注云臨海異物志曰枕榔木外皮有毛似旃欄而散生其木剛作鉄鋤利如鐵中石更利唯中焦根乃致敗耳皮中有似擣稻米片又似麥麩中作餅餌廣志曰枕榔樹大四五圍長五六丈洪直旁無枝條其顛生葉不過數十似櫻葉破其木肌堅難傷入數寸得麩赤黃密緻可食

徽墨西羌論七十七

女婦則徽墨而爲虜

注云徽糾繩也纏索也

都亭王美人傳十下

王美人兄斌遷執金吾封都亭侯。

注云凡言都亭者並城內亭也。漢法大縣侯位視三公小縣侯位視上卿鄉亭侯位視中二千石。

長秋宮明德馬皇后傳十上

永平三年春有司奏立長秋宮。

注云皇后所居宮也。長者久也。秋者萬物成熟之初也。故以名焉。請立皇后不敢指言故以宮稱之。

葱嶺西域傳論七十八

注云葱以山名也。西河舊事云其山高天生葱嶺故名。天竺記云葱嶺冬夏有雪有毒龍若犯之則

風雨晦冥飛砂揚礫過此者萬無一全。

雪山班超傳三十七 明帝永平十七年十六年

注云西河舊事曰白山之中有好木又郭義恭廣志曰西域有白山通歲有雪亦名雪山。

注云冬夏有雪故曰白山匈奴謂之天山過之皆下馬拜去蒲類海百里。

寶固破呼衍王於天山。

注云呼衍匈奴王號天山即祈連山一名雪山今名折羅漢山在伊州北祈音時。

龍沙班超傳

安定慷慨專功西遐坦步葱雪咫尺龍沙。

注云白龍堆沙漠也。

前漢匈奴傳注孟康曰白龍堆形如土龍身無頭有尾高大者二三丈埤者丈餘皆東北向相似也。在西域中。

聖壑大秦國傳七十八。

列置郵亭皆聖壑之。

注云聖飾也火既反郭璞曰聖白土也音惡。

原羊鮮卑傳八十。

鮮卑出野馬原羊。

注云郭璞注爾雅曰原羊似吳羊而大角出西方。

三臺袁紹傳六十四上。

注云漢官尙書爲中臺御史爲憲臺謁者爲外臺。

渾儀顯宗紀永平三年。

登靈臺見史官正儀度。

注云儀謂渾儀以銅爲之置於靈臺王者正天文之器也度謂日月星辰之行度也史官卽太史掌天文之官也。

螟蟻。顯宗紀。

詔曰。去其螟蟻。以及蝥賊。

注云。爾雅曰。食苗心曰螟。食根曰蝥。蟻一名短狐。今之水弩。含沙射人爲災也。

伏臘。顯宗紀永平十二年。

注云。史記曰。秦德公始爲伏祠。歷忌曰。伏者何也。金氣伏藏之日也。四氣代謝。皆以相生。至於立秋。以金代火。金畏於火。故庚日必伏。月令。孟冬之月。祀先祖。說文云。臘。冬至後祭百神。始皇更臘曰嘉平。

祖臘。陳龜傳三十六。

陳咸父子閉門不出。猶用漢家祖臘。

注云。應劭風俗通曰。共工之子好遠遊。死爲祖神。漢家火行。盛於午。故以午日爲祖也。臘者。歲終祭衆神之名。臘。接也。新故交接。故大祭以報功也。漢火行。衰於戌。故臘用戌日也。

塤籠。顯宗紀永平十年。

注云。燒土爲之。大如雁子。鄭衆曰。塤有六孔。世本曰。暴辛公作籠。以竹爲之。長尺四寸。有八孔。

冒彤。肅宗紀元和二年。

注云。字書曰。彤多須貌。音而。蒙冒其面。或曰。西域人多著冒而長。故舉以爲言也。

宰士。飛禍。周榮傳三十五。

注云。榮辟司徒袁安府。故稱宰士。飛禍言倉卒而死也。

告諡顯宗紀二。

太尉趙憙告諡南郊。

注云。風俗通曰。禮。臣子無爵諡。君父之義也。故羣臣累其功美。葬日遣太尉於南郊告天而諡之。

復士。顯宗紀。

注云。言下棺訖。復以土爲墳。故言復士。

邸第。甲第。安帝紀五。

注云。邸。屬國之舍也。第。謂甲乙之次第。

機衡。郎凱傳二十下。

尙書職在機衡。

注云。北斗魁星第三爲機。第五爲衡。於天文爲喉舌。

追北。臧宮傳八。

乘勝追北。

注云。人好陽而惡陰。北方幽陰之地。故軍敗者謂之北。史記樂書曰。北者。敗也。而近代音北爲背。失。

其旨矣。

赤地藏宮傳

旱蝗赤地。

注云赤地言在地之物皆盡說苑曰晉平公時赤地千里。

盤鍤魏書傳三

隗囂初起兵設盟祀畢有司穿坎於庭牽馬操刀奉盤錯鍤遂割牲而盟。

注云前書匈奴傳云漢書韓昌等與單于及大臣俱登諾水東山刑白馬單于以徑路刀金留犁撓酒應劭曰徑路匈奴寶刀也留犁飯匕也撓攪也以匕攪血而飲之今亦奉盤錯匙而飲也以此而言鍤卽匙字錯置也七故反其盟云鍤不濡血敵不入口是欺神明也。

秭歸和帝紀

永元十二年秭歸山崩。

注云秭歸縣屬南郡古之夔國今歸州也袁崧曰屈原此縣人旣被流放忽然暫歸其姊亦來因名其地爲秭歸秭亦姊也。

輜駟齊王續傳四

注云輜駟有擁蔽之車也列女傳曰齊孝公華孟姬謂公曰妾聞妃后踰國必乘安車輜駟說文曰

駟車衣車也。周禮注云。駟猶屏也。取其自蔽隱。

鹿門。鹿公傳七十三。

龐公攜妻子登鹿門山。因採藥不反。

注云。襄陽記曰。建武中。襄陽侯習郁立神祠於山。刻二石鹿夾神道口。俗因謂之鹿門廟。遂名山也。

果下馬。東夷傳七十五。

澁出果下馬。使來獻之。

注云。高三尺。乘之可於果樹下行。

縞素。順帝紀永建三年。

注云。縞。皓也。縞之精白者曰素。

師子封牛。順帝紀陽嘉二年。

疏勒國獻師子封牛。

注云。疏勒王遣使詣闕。師子似虎。正黃有髯。尾端茸毛大如斗。封牛。其領上肉隆起者。若封然。因

以名之。卽今之峯牛。

鴻都門學士。靈帝紀。

光和元年。始置鴻都門學士。

注云鴻都門名也。於內置學。時其中諸生皆勅州郡三公舉召。能為尺牘辭賦及工書鳥篆者。相課試至千人焉。

賣官靈帝紀

光和元年初開西邸賣官。自關內侯虎賁羽林入錢各有差。又私令左右賣公卿。公千萬。卿五百萬。

注云山陽公載記曰。時賣官二千石二千萬。四百石四百萬。其以德次應選者半之。或三分之一。於

西園立庫以貯之。

天祿

渴烏。靈帝紀中平三年張讓傳六十八。前漢西域傳六十六上。

靈帝修玉堂殿。鑄銅人四。黃鍾四。及天祿蝦蟆。

注云黃鍾其音中黃鍾。子為黃鍾。天祿獸也。案今鄧州南陽縣北有宗資碑。旁有兩石獸。鑄其一曰天祿。一曰辟邪。據此天祿辟邪並獸名。時漢有天祿閣。亦因獸而立名。

使掖庭令畢嵐鑄銅人四。列於倉龍玄武闕外。鍾縣於玉堂及雲臺殿前。天祿蝦蟆吐水於平門外橋東。轉水入宮。又作翻車渴烏。施於橋西。用灑南北郊路。

注云翻車設機車以引水。渴烏為曲筒。以氣引水上也。

前漢西域傳烏戈國有桃拔師子犀牛。

孟康曰桃拔一名符拔。似鹿長尾一角者。或為天鹿。兩角者或為辟邪。拔步葛反。

紹介符融傳五十八

注云古人相見必因紹介介因也言因此人以相接見也

六韜何進傳五十九

注云太公六韜篇第一霸典文論第二文師武論第三龍韜主將第四虎韜偏裨第五豹韜校尉第六犬韜司馬龍韜云武王曰吾欲令三軍之衆親其將如父母聞金聲而怒聞鼓音而喜爲之奈何

蒙衝船爾衡傳七十下

黃祖在蒙衝船上大會賓客

注云釋名曰外狹而長曰蒙衝以衝突敵船

推步馮鯤傳二十八

馮鯤善推步之術

注云推步謂究日月五星之度昏旦節氣之差

霄仲長統傳三十九

注云霄摩天赤氣也

沆澹仲長統傳

沆澹當餐九陽代燭

注云。沆瀣者。北方夜半氣也。九陽。謂日也。山海經曰。陽谷上有扶木。九日居下枝。一日居上枝也。
穀飲。仲長統傳論。

世非胥庭人乖穀飲。

注云。赫胥氏。大庭氏。並古之帝號。莊子曰。夫聖人鶉居而穀飲。言鶉鳥無常居。穀飲不假物。並淳朴時也。

廬落。院落。仇覽傳六十六。

仇覽過邑人陳元之舍。曰。廬落整頓。耕耘以時。此非惡人。教化未至耳。

注云。落居也。案今之人。謂院為落也。

熊經。鷓顧。華陀傳七十二下。

注云。熊經。若熊之攀枝自懸也。鷓顧。身不動而迴顧也。莊子曰。吐故納新。熊經鳥申。導引養形之人也。

餌胡麻。乘白鹿方術傳。

注云。漢武內傳曰。魯女生。初餌胡麻及朮。絕穀八十餘年。日少壯。色如桃花。道成。一旦與故人別。云入華山。去後五十年。先相識者逢女生。華山廟前。餌胡麻。從玉女三十人。并令謝其鄉里親故也。

青牛道士甘始傳。

注云漢武內傳曰封君達初服黃連五十餘年入烏舉山服水銀百餘年還鄉里如二十者常乘青牛故號青牛道士。

風問高彪傳七十下。

高彪與馬融書曰承服風問從來有年。

注云風問風猷令問也。

鵠髮承宮傳贊十七。

注云鵠髮白髮也。

明府張湛傳十七。

張湛爲左馮翊主簿進曰明府位尊德重。

注云郡守所居曰府明府者尊高之稱韓延壽爲東郡太守門卒謂之明府亦其義也。

燒塢丁鴻傳二十七。

昔孫叔敖勅其子受封必求礲确之地。

注云孫叔敖楚相也將死戒其子曰王封汝必無居利地也楚越之間有寢邱者甚惡可長有以食也燒苦交反塢苦角反。

金沙光珠西南夷傳七十六。

注云華陽國志曰。蘭滄水有金沙。洗取融爲金。有光珠穴。博物志曰。金沙卽江珠也。

六丁。梁節王傳四十。

梁節王暢數有惡夢。從官卞忌自言能使六丁善占夢。

注云六丁謂六甲中丁神也。若甲子旬中則丁卯爲神。甲寅旬中則丁巳爲神之類也。役使之法。先齋戒。然後其神至。可使致遠方物。及知吉凶也。

玉搔頭。李固傳五十三。

注云西京雜記曰。武帝遇李夫人。就取玉簪搔頭。自此宮人搔頭皆用玉。

牛黃。延篤傳五十四。

注云吳普本草曰。牛黃味苦無毒。牛出入呻者有之。夜有光走角中。牛死入膽中。如雞子黃。神農本草曰。療驚癇。除邪逐鬼。

五嶺。吳祐傳。

注云嶺者西自衡山之南。東至於海。一山之限耳。別標名則有五焉。裴氏廣州記云。大庾。始安。臨賀。揭陽。桂陽。是爲五嶺。鄧德明南康記曰。大庾一也。桂陽甲騎二也。九真都龐三也。臨賀萌主四也。始安越城五也。裴氏之說則爲審矣。

壽藏。趙岐傳。

趙岐先自爲壽藏。

注云壽藏謂塚壙也。稱壽者取其久遠之意也。猶如壽宮壽器之類。

金蠶。

永嘉末。發齊桓公墓。得水銀池。金蠶數十箔。

五溪。馬援傳十四。

注云。酈元注水經云。武陵有五溪。謂雄溪、橘溪、酉溪、澗溪、辰溪。悉是蠻夷所居。故謂五溪蠻。皆槃瓠子孫也。土俗雄作熊。橘作朗。澗作武。在今辰州界。

投劾。周雙等傳序四十三。

太原閔仲叔。世稱節士。建武中。應司徒侯霸之辟。既至。霸不及政事。徒勞苦而已。仲叔恨曰。以仲叔爲不足問邪。不當辟也。辟而不問。是失人也。遂辭出。投劾而去。

注云。案罪曰劾。自投其劾狀而去也。投猶下也。今有投辭投牒之言。

精廬。姜肱傳四十二。

姜肱與弟季江謁郡。夜於道遇盜。欲殺之。肱兄弟更相爭死。遂兩釋焉。但掠奪衣資而已。既至郡中。終不言盜。盜聞而感悔。後乃就精廬來見徵君謝罪。

注云。諸公嘗爭加辟命。肱皆不就。故曰徵君。精廬卽精舍也。

水排杜詩傳二十一

杜詩爲南陽太守造作水排鑄爲農器百姓便之。

注云排蒲拜反冶鑄者爲排以吹炭今激水以鼓之排當作囊古字通用也。

捲握張堪傳

捲握之物足富十世。

注云捲握猶掌握謂珠玉之類。

鳧藻杜詩傳

士卒鳧藻。

注云言其和睦歡悅如鳧之戲於水藻。

方舟班固傳三十上

方舟並駑。

注云方舟並兩舟也。

雨師風伯班固傳三十下

東都賦雨師汎灑風伯清塵。

注云雨師畢星也風伯箕星也。

龍門李膺傳五十七

注云三秦記曰河津一名龍門水險不通魚鼈之屬莫能上江海大魚薄集龍門下數千不得上則爲龍也。

巫覡之言張衡傳四十九

注云前書曰齊肅聰明者神或降之在男曰覡在女曰巫覡胡歷反。

銀臺張衡傳

聘王母於銀臺。

注云銀臺仙人所居也。

曾城張衡傳

張衡賦云登閼風之曾城兮。

注云閼風山名在崑崙山上淮南子曰崑崙山有曾城九重高萬一千里。

尺牘蔡邕傳五十下

注云說文曰牘書板也長一尺。

獄犴填滿崔駰傳四十二

注云犴音岸前書音義曰鄉亭之獄曰犴。

容車祭遵傳十

祭遵薨，贈以將軍侯印綬，朱輪容車，介士軍陳送葬。

注云：容車，容飾之車，象生時也。

交河，耿恭傳九。

發兵擊車師，攻交河城。

注曰：前書曰：車師前王居交河城，河水分流繞城下，故號交河。去長安八千一百五十里，故城在今

西州交河縣也。

翡翠，班固傳三十上。

注云：異物志曰：翠鳥，形似鸞，赤而雄曰翡，青而雌曰翠，其羽可以爲飾。

丙穴，公孫述傳三。

蜀有魚鹽之利。

注云：丙穴出嘉魚，在漢中。

三泉，袁紹傳六十四上。

無令愚臣結恨三泉。

注云：三者，數之小終，言深也。前書曰：下錮二泉。

折角巾。郭太傳五十八。

郭太身長八尺。褻衣博帶。嘗於陳梁間行。遇雨。巾一角墊。時人乃故折巾一角。以爲林宗巾。其見慕皆如此。

注云。墊。丁念反。巾以葛爲之。形如幘。口沿反。本居士野人所服。魏武造幘。其巾乃廢。今國子學生服焉。以白紗爲之。

邊幅。公孫述傳論三。馬援傳。

公孫述不能因隙立功。以會時變。方乃坐飾邊幅。以高深自安。

注云。邊幅。猶有邊緣。以自矜持。

脩飾邊幅。

注云。若布帛脩整其邊幅也。左傳曰。如布帛之有幅焉。爲之度。使無邊。

蔡侯紙。蔡倫傳六十八。

自古書契。多編以竹簡。其用縑帛者。謂之紙。縑貴而簡重。並不便於人。尙方令蔡倫乃造。意用樹膚麻頭。及敝布魚網。以爲紙。奏上之。帝善其能。故天下咸稱蔡侯紙。

注云。湘州記曰。來陽縣北。有漢黃門蔡倫宅。宅西有石臼。云是倫舂紙臼也。

突騎。光武紀更始二年。

耿況、彭寵各遣其將吳漢、寇恂等將突騎來助擊王郎。

注云：突騎言能衝突軍陣。

三輔光武紀更元年 前漢百官表七上

注云：謂京兆、左馮翊、右扶風，其在長安中分領諸縣。

前書百官表曰：內史、周官。秦因之掌治京師。景帝二年分置左內史、右內史。武帝太初元年更名京兆

尹。左內史更名左馮翊，又更名主爵都尉，為右扶風。治內史、右地與左馮翊、京兆尹是為三輔。

服虔云：皆治在長安城中。

門下掾公孫述傳三

公孫述補清水長時，父仁為河南都尉，以述年少，遣門下掾隨之官。

注云：州郡有掾皆自辟除之，常居門下，故以為號。

錚錚劉盆子傳二

樊崇將劉盆子及丞相徐宣已下三十餘人，肉袒降光武。光武謂徐宣、樊崇等曰：卿所謂鐵中錚錚，備

中佼佼者也。

注云：說文曰：錚錚，金也。鐵之錚錚，言微有剛利也。錚，初耕反。佼佼，古巧反。佼佼，好貌也。佼佼者，凡庸之人

稍為勝也。

爛頭羊劉元傳一

更始起兵稱天子其所授官爵者皆羣小賈豎或有膳夫庖人長安爲之語曰竈下養中郎將爛羊胃都騎尉爛羊頭關內侯

注云公羊傳曰炊烹爲養

綠林劉元傳

王莽末南方饑饉人庶羣入野澤掘臍此而食之更相侵奪新市人王卞王鳳爲平理諍訟遂推爲渠帥於是諸亡命馬武王常成丹等往從之藏於綠林中數月間至七八千人後至五萬人州郡不能制於是劉聖公光武皆起兵焉

注云綠林山在今荊州當陽縣東北

黃巾皇甫嵩傳六十

鉅鹿張角自稱大賢良師奉事黃老道畜養弟子符水呪說以療病病者頗愈百姓信向之角因遣弟子八人使於四方教化天下轉相誑惑十餘年間徒衆數十萬置三十六方方猶將軍號也大方萬餘人小方六七千各立渠帥訛言蒼天已死黃天當立弟子唐周上書告之靈帝使案驗宮省直衛及百姓有事角道者誅殺千餘人角等知事已露晨夜馳勅諸方一時俱起皆著黃巾爲標幟時人謂之黃巾亦名蛾賊殺人以祠天角稱天公將軍天下嚮應帝乃發天下精兵以皇甫嵩爲左中郎將朱雋爲

中郎將各統一軍討平之。

注云蛾魚綺反即蟻字也。諭賊衆多故以爲名。

赤眉。劉盆子傳一。

琅邪人樊崇起兵於莒。一歲間至萬餘人。時青徐大饑。寇賊蜂起。羣盜以崇勇猛皆附之。王莽遣廉丹、王卞擊之。崇等欲戰。恐其衆與莽兵亂。乃皆朱其眉以相識別。由是號曰赤眉。赤眉遂大破丹、卞軍。更始都洛陽。遣使降崇。崇等聞漢室復興。卽留其兵。自將渠帥二十餘人隨使者至洛陽。更始皆封爲列侯。復亡歸其營。分兵爲二部。攻拔城邑。衆遂大集。立劉盆子爲帝。其後奉傳國璽降光武。

錢塘。朱簡傳六十一。

注云錢塘今杭州縣也。錢塘記云昔郡議曹華信義立此塘以防海水。始開募有能致土石一斛與錢一千旬日之間來者雲集。塘未成而譎不復取。皆遂棄土石而去。塘以之成也。

華陽國志。

益州古梁州之域。尚書曰華陽黑水惟梁州。孔安國注曰北拒華山之陽。南拒黑水。故常璩敘蜀事而謂之華陽國志。黑水出張掖雞山。南流至燉煌。過三危山。又南流而入南海。

蟬蛻。仲長統傳三十九。

仲長統詩曰飛鳥遺跡。蟬蛻亡殼。騰蛇棄鱗。神龍喪角。

注云。王充論衡曰。蟬化爲復育。復育轉爲蟬。蟬之去復育。龜之解甲。蛇之脫皮。可謂尸解矣。爾雅曰。騰蛇有鱗。廣雅曰。有角曰龍。喪角解角也。

日祀。間祀。肅宗紀三。

肅宗卽位。有司奏言。孝明皇帝自稱不德。無起寢廟。掃地而祭。除日祀之法。省送終之禮。遂藏主於光烈皇后更衣別室。臣愚以爲更衣在中門之外。處所殊別。宜尊廟曰顯宗。其四時禘祫。於光武之堂。間祀。悉還更衣。

注云。春秋外傳曰。日祭月祀時享。祖禰則日祭。高曾則月祀。三禘則時享。今此除日祀之法。從時月之祭。續漢書曰。五年再殷祭。三年一祫。五年一禘。父爲昭。南向。子爲穆。北向。禘以夏四月。祫以冬十月。禘之爲言。諦也。諦審昭穆尊卑之義。祫者合也。冬十月五穀成。故骨肉合。飲食於祖廟。謂之殷祭。四時正祭外。有五月嘗麥。三伏立秋嘗棗。盛酎。十月嘗稻等。謂之間祀。卽各於更衣之殿。更衣者非正處也。園中有寢。有便殿。寢者陵上正殿。便殿寢側之別殿。卽更衣也。

騎奴。

京師貴戚奢過王制。其嫁娶。騎奴侍童夾轂並引。

矢石。聖鑰傳十二。

注云。石謂發石以投人也。墨子曰。備城者積石百枚。重十鈞以上者。

金行之氣西羌傳

西羌人性堅剛勇猛得西方金行之氣焉

注云黃帝素問曰西方者金玉之域其人山居而多風水土剛強

鈴決之符方術傳序七十二上

注云兵法有玉鈴篇及玄女六韜要訣太公對武王曰主將有陰符謂若大勝得敵之符符長一尺破軍擒敵之符符長九寸之類

胎息氣王真傳七十二下

注云漢武內傳曰王真字叔經上黨人習閉氣而吞之名曰胎息習嗽舌下泉咽之名曰胎食真行之斷穀二百餘年肉色光美力並數人抱朴子曰胎息者能以鼻口噓吸如在胎之中嗽音朔

鰻魚伏隆傳十六

張步據青徐遣使獻鰻魚

注云郭璞注三蒼云鰻似蛤偏著石廣志曰鰻無鱗有殼一面附石細孔雜雜或七或九本草云石

決明一名鰻魚步角反

黃鉞馮勒傳十六

注云鉞斧也以黃金飾之所以戮人

方底囊。隱害。廣陵思王傳三十二。前漢孝成趙皇后傳。

廣陵思王荆。性刻急。隱害。光武崩。大行在前殿。荆哭不衰。而作飛書。封以方底。令蒼頭詐稱東海王疆。舅郭況書與疆。疆得書。惶怖。卽執其使。封書上之。

注云。隱害。謂陰害於人也。方底囊。所以盛書也。

前書外戚傳。中黃門田客持詔記。盛綠綈方底。

師古曰。綈。厚繒也。綠。其色。方底。盛書囊。若今之算騰耳。

銀璫。朱穆傳三十三。

案漢故事。中常侍參選士人。建武以後。乃悉用宦者。自延平以來。浸溢貴盛。假貂璫之飾。處常伯之任。天朝政事。一更其手。

注云。璫。以金爲之。當冠前。附以金蟬也。漢官儀曰。中常侍。奉官也。漢興。或用士人。銀璫在貂。光武以後。專任宦者。右貂金璫。常伯侍中也。

黥首繫趾。朱穆傳。

注云。黥首。謂鑿額涅墨也。繫趾。謂鈇其足也。以鐵著足曰鈇。

五時衣。東平憲王蒼傳三十二。

帝饗衛士於南宮。因從皇太后周行掖庭池閣。乃閱陰太后舊時器服。愴然動容。乃命留五時衣各一。

襲餘悉分布諸王，王及子孫在京師者。

注云：五時衣，謂春青、夏朱、季夏黃、秋白、冬黑也。

黨錮 黨錮傳五十七

桓靈之間，國命委於閹寺，士子羞與爲伍，故匹夫抗憤，處士橫議，遂乃激揚名聲，互相題拂，品覈公卿，裁量執政。初，桓帝受學於甘陵周福，及帝卽位，擢福爲尙書，時同郡河南尹房植有名當朝，鄉人爲之謠曰：天下規矩房伯武，因師獲印周仲進。二家賓客互相譏揣，由是甘陵有南北部，黨人之議自此始矣。後汝南太守宗資任功曹范滂，南陽太守成瑨亦委功曹岑暄，二郡又爲謠曰：汝南太守范孟博，南陽宗資主畫諾，南陽太守岑公孝，宏農成瑨但坐嘯。因此流言轉入太學，諸生三萬餘人，郭林宗、賈傳節爲其冠，並與李膺、陳蕃、王暢更相褒重。學中語曰：天下模楷李元禮，不畏強禦陳仲舉，天下俊秀王茂叔，河內張成善說風角，推占當赦，遂教子殺人。李膺爲河南尹，督促收摘，旣而逢宥，獲免。膺竟按殺之，成弟子牢脩因上書誣告膺等，養太學遊士，交結諸郡生徒，共爲部黨，誹訕朝廷。於是天子震怒，班下郡國，逮捕黨人，遂收執膺等，其辭所連陳實之徒二百餘人，或有逃遁，皆懸金構募，使者四出，相望於道。明年，竇武等並表請，帝意稍解，乃皆赦歸田里，禁錮終身，而黨人之名猶書王府。自是正直廢放，邪枉熾結，海內希風之流，遂共相標榜，指天下名士爲之稱號，有三君、八俊、八顧、八及、八廚之號。張儉、鄉人朱並承望中常侍侯覽意旨，上書告儉與同鄉二十四人，別相署號，共爲部黨，圖危社稷，而儉爲

之魁。大長秋曹節因此諷有司奏部前黨。收司空虞放。少府李膺。太尉掾范滂等百餘人。皆死獄中。自此諸爲怨隙。因相陷害。又州郡承旨。或有未嘗交關。亦離禍毒。其死徙者廢禁者六七百人。及黃巾賊起。乃大赦黨人。皆歸故郡。凡黨事始自甘陵。汝南。成於李膺。張儉。海內塗炭二十餘年。諸所蔓衍。皆天下善士。

注云。標榜。猶相稱揚也。榜與榜同。

風爲號令。張奐傳五十五。蔡邕傳五十下又注。

建甯二年。大風雨。雹霹靂。拔樹。詔百寮言災應。張奐曰。風爲號令。動物通氣。順至爲休徵。逆來爲殃咎。注云。凡風者。天之號令。所以譴告人君者也。

明衣。范甯傳七十一。

注云。禮。送死者衣曰明衣。器曰明器。鄭元注云。明者。神明之也。此言明堂。亦神明之堂。謂壙中也。杠。費長房傳七十二下。

壺公樓下有少酒。長房使十人杠之。猶不舉。

注云。說文曰。兩人對舉爲杠。音江。

五經博士。一家之學。章帝紀。

建初四年。詔建立五經。爲置博士。其後學者精進。雖曰承師。亦別名家。宣帝遂立大小夏侯尙書。後立

京氏易。至建武中。復置顏氏。嚴氏春秋。大小戴禮博士。

注云。言雖承一師之業。其後觸類而長。更爲章句。則別爲一家之學矣。大小夏侯。謂夏侯勝。勝從兄子建也。京氏。京房也。嚴氏。謂嚴彭祖。顏氏。謂顏安樂也。大小戴。戴德。戴聖也。

白虎觀。石渠。肅宗紀。建初四年。前漢施讐傳五十八。前漢儒林傳五十八。

肅宗詔下太常。將大夫博士議郎郎官。及諸生諸儒會白虎觀。講議五經同異。使五官中郎將魏應承制問。侍中淳于恭奏。帝親稱制臨決。如孝宣甘露二年。詔諸儒講五經同異。蕭望之等平奏其議。上親稱制臨

決焉。乃立梁邱易。大小夏侯尚書。穀梁春秋博士。

施讐爲博士。甘露中。與五經諸儒雜論同異於石渠閣。

師古曰。三輔故事云。石渠閣在未央殿北。以藏祕書也。

前漢儒林傳贊云。自武帝立五經博士。開弟子員。設科射策。勸以官祿。百有餘年。傳業者寔盛。一經說至百餘萬言。大師衆至千餘人。蓋祿利之路。然初書唯有歐陽。禮后。易。楊。春秋。公羊而已。至孝宣元帝時。又廣諸家矣。平帝時。又立左氏春秋。毛詩。逸禮。古文尚書。

墓祭。顯宗紀。

永平元年春正月。帝率公卿已下朝於原陵。如元會儀。

注云漢官儀曰古不墓祭秦始皇起寢於墓側漢因而不改諸陵寢皆以晦望二十四氣三伏社臘及四時上飯其親陵所宮人隨鼓漏理被枕具盥水陳莊具天子以正月上原陵公卿百官及諸侯王郡國計吏皆當軒下占其郡國穀價四方改易欲先帝魂魄聞之也。

專門儒林傳贊六十九下 質帝紀

儒林傳云塗分流別專門並興

注云說經者各自是其一家

本初元年令郡國舉明經各令隨家法

注云儒生爲詩者謂之詩家禮者謂之禮家故言各隨家法也

兩漢博聞卷第十一

封禪光武紀

中元元年幸魯柴望岱宗登封太山禪梁父

注云岱宗太山也梁父太山下小山也封謂聚土爲壇壇謂除地而祭改壇爲禪神之也續漢志曰特上御輦升山卽位於壇南北面尙書令奉玉牒檢皇帝以寸三分璽親封之藏玉牒已以石覆訖尙書令以五寸印封石檢畢皇帝再拜禪祭地於梁陰以高后配山川羣神從祀焉其玉牒文祕刻石文辭多不載

使君周恂傳六郭伋傳二十一

寇恂爲上谷太守耿況功曹更始立遣使者徇郡國恂從況迎使者上印綬使者納之無還意恂勒兵入見使者就請之曰使君建節銜命以臨四方今始至上谷而墮大信將復何以號令他郡乎遂授況印綬

注云君者尊之稱故曰使君

郭伋爲并州牧行部有童兒騎竹馬迎之曰聞使君到喜故來迎

太史公光武紀中元元年

注云。太史史官之長也。前書音義曰。太史公武帝置位在丞相之上。

巴蜀光武紀

注云。蜀有巴郡。故總言之。

使匈奴中郎將擁節光武紀

建武六年。匈奴遣使來獻。使中郎將報命。

注云。漢官儀曰。使匈奴中郎將。擁節。秩比二千石。

匈奴傳論曰。馳中郎之使。

都護西域傳七十八

武帝時。西域內屬有三十六國。漢爲置校尉領護之。宣帝改曰都護。

注云。前書云。李廣利征討大宛之後。屯田渠犂。置使者領營護田。以供使外國也。宣帝時。以鄭吉前

破車師。後降日逐。遂并令護車師。以西北道。號曰都護。都護之置。始於吉也。

修覺字傳林傳序六十九上

注云。說文曰。覺。學也。覺與橫同。儒林傳云。遊庠序。聚橫塾者。蓋布之於邦域矣。

博士十四家徐防傳三十四

徐防曰。漢以孔聖既遠。微旨將絕。故開置大學。立博士十有四家。設甲乙之科。以勉勸學者。

注云漢官儀曰光武中興恢宏稽古易有施孟梁邱賀京房書有歐陽和伯夏侯勝建詩有申公轅固韓嬰春秋有嚴彭祖顏安樂禮有戴德戴勝凡十四博士太常差遣有聰明威重一人爲祭酒總領綱紀也前書曰歲課甲科四十人爲郎中乙科三十人爲太子舍人丙科二十人補文學掌故

家法徐防傳

徐防曰伏見太學試博士弟子皆以意說不修家法

注云諸經爲業各自名家

石經儒林傳序

靈帝詔書諸儒正定五經刊於石碑爲古文篆隸三體書法以相參檢樹之學門使天下咸取則焉

注云古文謂孔子壁中書篆隸並程邈所作也

膝囊儒林傳序

董卓移都之際典策剖散其縑帛圖書大則連爲帷蓋小則制爲膝囊

注云膝亦膝也徒恆反說文曰膝囊也

樓櫓匈奴傳七十九 公孫瓚傳

造戰車可駕數牛上作樓櫓置於塞上以拒匈奴

注云櫓卽樓也釋名曰樓無屋爲櫓

樓櫓千里。

注云櫓卽櫓字。說文釋名曰櫓露也。上無覆屋也。

三家詩。儒林傳六十九下。

前書魯人申公受詩於浮邱伯。爲作詁訓。是爲魯詩。齊人轅固生亦傳詩。是爲齊詩。燕人韓嬰亦傳詩。是爲韓詩。三家皆立博士。趙人毛萇傳詩。是爲毛詩。未得立。平帝時方立毛詩。

西域南山。西域傳七十八。

西域東極玉門陽關。西至葱嶺。其東北與匈奴烏孫相接。南北有大山。中央有河。其南山東出金城。與漢南山屬焉。其河有兩源。

匈奴龍祠。南匈奴傳七十九。

注云。前書匈奴法。歲二月。諸長小會。單于庭祠。五月。大會龍城。祭其先天地鬼神。八月。大會蹕林。課校人畜計。蹕音帶。

醢酒。臧宮傳八。

臧宮陳兵大會。擊牛醢酒。

注云。醢。所宜反。說文云。下酒也。詩注曰。以筐曰醢也。

羯胡。吳漢傳論八。

戎羯喪其精膳。

注云。羯本匈奴別部分散居其上黨武鄉羯室。因號羯胡。此總謂戎夷耳。不指於羯也。

幅巾。鮑永傳十九。趙咨傳二十九。韋彪傳十六。

注云。幅巾謂不著冠。但幅巾束首也。

太尉楊賜辟趙咨。使飾巾出入。請與講議。

注云。以幅巾爲首飾。不加冠冕。又符融傳注云。幅巾以一幅爲之。

韋著不應州郡之命。靈帝就家拜東海相。詔書逼切。不得已。解巾之郡。

注云。巾幅巾也。既服冠冕。故解幅巾。

馬當匈。鮑永傳。

鮑永。太守拔佩刀截馬當匈。

注云。當匈以韋爲之也。

含元包。一。郵傳十九。

注云。前書志曰。太極元氣。含三爲一。謂三才未分。包而爲一。

祕經。蘇竟傳二十上。

注云。謂幽祕之經。卽緯書之類也。

跼蹐蘇竟傳

皇天所以眷顧跼蹐憂漢子孫者也。

注云。跼蹐猶徘徊也。

綈裘楊厚傳二十上。

楊厚之祖春卿善圖讖學。臨終戒其子統曰。吾綈裘中有先祖所傳祕記。爾其修之。

注云。綈厚繒也。音提。

請讖襄楷傳二十下。

注云。讖疑也。謂罪有疑者。讖於廷尉也。

君子不死之國。東夷傳七十五。

東夷天性柔順。易以道御。至有君子不死之國焉。

注云。山海經曰。君子國衣冠帶劍。食獸。使二文虎在旁。去琅邪三萬里。山海經又曰。不死人在交脛

東。其爲人黑色。壽不死。並在東方也。

德星。襄楷傳二十下。

注云。德星。歲星也。

不三宿桑下。佛陁。襄楷傳。

襄楷上疏曰。浮屠不三宿桑下。不欲久生恩愛。精之至也。今陛下媵女豔婦。極天下之麗。

注云。浮屠即佛也。但聲轉耳。並謂佛也。言浮屠之人寄桑下者。不經三宿。便即移去。示無愛戀之心也。

晉神養和周盤傳二十九。

注云。嗇。愛惜也。

季母。西域傳。

注云。季母。叔母也。

青門。逢萌傳七十三。

逢萌解冠。挂東都城門。

注云。漢宮殿名。東都門。今名青門也。前書音義曰。長安東都城北頭第一門。

毘毘。西域傳七十八下。

天竺國出細布好毘毘。

注云。毘。它闔反。毘音登。埤蒼曰。毛席也。釋名曰。施之承大牀前小榻上。登以上牀也。

奇幻。西域傳。

注云。大秦國俗多奇幻。口中出火。自縛自解。跳十二丸。巧妙非常。

流沙傳論七十八 李恂傳四十一

天竺記云西度流沙屢有熱風惡鬼過之必死

注云廣志曰流沙在玉門關外東西數百里有三斷名曰三隴故曰隴沙以西使命不得通也

海大秦國 蘇合香西域傳

大秦國在海西亦云海西國其人民皆長大正類東國故謂之大秦其國合會諸香煎其汁以爲蘇合

魂歸岱 天孫烏桓傳八十

烏桓國言死者神靈歸赤山赤山在遼東西北數千里如中國人死者魂神歸岱山也

注云博物志泰山魂帝歸也主召人魂東方萬物始故知人生命

貂鼪 鮮卑傳八十

鮮卑有貂鼪鼪子皮毛柔蟬故天下以爲名裘

注云獬女滑反鼪胡昆反貂鼪並鼠屬獬獬屬也

軼祀 吳祐傳五十四

注云祖道之禮封土爲軼壇也五經要義曰祖道者行祭爲道路祈也周禮太馭掌王玉路以祀軼

注云軼祀者封土象山於路側以芻棘柏爲神主祭之以車轆軼而去喻無險難也

秦海 西域傳

敦煌太守張璠上書以爲北虜呼衍王常展轉蒲類秦海之間專制西域共爲寇鈔

注云大秦國在西海西故曰秦海也蒲類亦國名

文犀馬援傳十四

注云犀之有文彩者也

藁葬馬援傳

馬援既卒有上書譖援前所載南方薏苡一車皆明珠文犀帝益怒援妻孥惶懼不敢以喪還舊塋買城西數畝地藁葬而已

注云藁草也以不歸舊塋時權葬故稱藁

幅裂南匈奴傳論七十九

方夏幅裂

注云諸夏如布帛之裂也

虹蜺楊賜傳四十四

注云爾雅云雙出色鮮盛者爲雄曰虹闇者爲雌曰蜺

投蜺楊賜傳

春秋讖曰投蜺天下怨海內亂

注云春秋演孔圖曰。霓者斗之亂精也。失度投霓見。宋均注曰。投霓。投應也。

配祔。陳球傳四十六。

曹節欲祔葬竇太后。而以馮貴人配祔。

注云。祔謂新死之主於先死者之廟。婦祔於其夫。

投暮。任光傳十一。

注云。投。至也。

選儒之恩。清河孝王傳四十五。

注云。選儒仁弱。慈戀不決之意。儒仁竟反。

聚落。

聚落化其德。

注云。小於鄉曰聚。廣雅曰。落。居也。

玉門關。班超傳三十七。

注云。玉門關。屬敦煌郡。今沙州也。在敦煌縣西北。

小杜律。郭躬傳三十六。

注云。武帝時廷尉杜周之子延年。亦明習法律。宣帝時爲御史大夫。對父故言小。

管宄陳忠傳三十六

如其管宄，妄有機刺。

注云：管宄，言小也。史記扁鵲曰：若以管窺天。

宿麥安帝紀五

注云：宿，舊也。麥必經年而熟，故稱宿。

命夫安帝紀

注云：命夫者，其男子之爲大夫也。命婦者，其大夫之妻也。

大行安帝紀

注云：前書音義，韋昭云：大行者，不反之辭也。天子崩未有諡，故稱大行也。穀梁傳曰：大行受大名。

青部臧洪傳四十八

袁紹以臧洪爲青州刺史，時羣盜颯起，而青部殷實。

拘儒左雄等傳論五十二

處士鄙生，忘其拘儒，拂巾衽褐，以企放車之招矣。

注云：拘儒，猶褊狹也。

置之度外公孫述傳三

漢帝釋關隴之憂。

注云。隗囂居西無東之意。故置之度外而不爲憂。

解構。隗囂傳三。

帝與隗囂書曰。自今已後。手書相聞。勿用人解構之言。

注云。解構。猶間構也。

抵掌。隗囂傳。

注云。說文。抵。側擊也。戰國策曰。蘇秦與李允抵掌而談。

糗糒。隗囂傳。

注云。周禮曰。糗。熬大豆與米也。說文云。糒。乾飯也。

坏治。崔駰傳四十一。

坏治一陶。

注云。坏。土器之未燒者。

刻玉版。崔駰傳。

策合道從。克亂弭衝。乃將鏤元珪。册顯功。

注云。珪。玉也。詩含神霧曰。刻之玉版。藏之金匱。

銘功鼎崔駰傳

注云墨子曰昔夏后開冶使飛廉析金於山以鑄鼎於昆吾蔡邕銘論曰呂尙作周太師其功銘於昆吾之鼎也

勒景襄之鍾崔駰傳

注云國語曰晉魏顆以其身退秦師於輔氏其勳銘於景鍾此兼言襄也

欽頤周變傳四十三

周變生而欽頤折頰醜狀駭人其母欲棄之其父不聽曰吾聞聖賢多有異貌

注云頤頰也欽頤曲頰也說文曰頰鼻莖也折亦曲也欽良冉反欽或作斂音同

髻周變傳

周變始在髻髻而知廉讓

注云髻髮也禮記曰子生三月之末擇日翦髮爲髻男角女羈否則男左女右髻徒果反

恭館班固傳三十下

啓恭館之金滕

注云恭肅之館謂廟中也金滕以金緘匱藏符瑞之書於其中也

遂古班固傳

注云。遂古猶遠古。

茹薇。申屠蟠傳四十三。

昔人之隱。巢棲茹薇。

注云。巢棲猶巢父也。薇似藿也。

診脈。郭玉傳七十二下。

有老父不知何出。常漁釣於涪水。因號涪翁。見有疾者。時下針石。輒應時而效。乃著針經診脈法。傳於世。

注云。診候也。

賈胡。李恂傳四十一。

注云。賈胡。胡之商賈也。

鼓下戮人。岑彭傳七。

光武收韓歆。置鼓下。將斬之。

注云。中將軍最尊。自執旗鼓。若置營則立旗。以爲軍門。并設鼓。戮人必於其下。

攘袂。

攘袂而正讓。

注云。袂。衣袖也。攘袂。猶今之言捋臂也。

錄尚書事。肅宗紀三。

肅宗以侯憲爲太傅。牢融爲太尉。並錄尚書事。

注云。武帝初以張子孺領尚書事。錄尚書事由此始。

放手。顯宗紀。

權門請託。殘吏放手。

注云。放手。謂貪縱爲非也。

贖刑。顯宗紀。

詔曰。方春戒節。人以耕桑。其敕有司。務順時氣。使無煩擾。天下亡命殊死已下。聽得贖論。死罪入縲二十四。右趾至髡鉗城旦。春十四。完城旦。春至司寇作三匹。

注云。前書音義曰。右趾謂別其右足。次別左足。次劓。次髡鉗爲城旦。春。城旦者。晝日伺寇虜。夜暮築長城。春者。婦人犯罪不任軍役之事。但令春以食徒者。完者。謂不加髡鉗而築城也。次鬼薪白粲。次隸臣妾。次作司寇。

投傳。陳蕃傳五十六。

豫州刺史周景辟陳蕃爲別駕從事。蕃以諫爭不合。投傳而去。

注云投棄也。傳謂符也。丁戀反。

度遼將軍。五原。顯宗紀。

永平五年。北匈奴寇五原。八年初。置度遼將軍。屯五原曼柏。

注云。武帝拜范明友爲度遼將軍。至此復置焉。以中郎將吳常行度遼將軍。曼柏縣。在今勝州銀城縣。

部將。寇恂傳六。

注云。部將。謂軍部之下小將也。

天人致誅。班固傳三十下。

往者王莽作逆。漢祚中缺。天人致誅。六合相滅。

注云。天人。謂天意。人事共相誅也。

封事。副封。顯宗紀永平八年。

詔羣司勉修職事。極言無諱。於是在位者皆上封事。各言得失。

注云。宣帝始令羣臣得奏封事。以知下情。封有正有副。領尙書者先發副封。所言不善。屏而不奏。後魏相奏去副封。以防擁蔽。

昆侖塞。顯宗紀。

永平十七年，竇固、耿秉、劉張出敦煌，昆侖塞擊破，白山虜於蒲類海上。

注云：昆侖山名，因以爲塞。在今肅州酒泉縣西南。山有昆侖之體，故名之。周穆王見西王母於此山，有石室，王母臺。

郎官上應列宿顯宗紀

郎官上應列宿，出宰百里。

注云：史記曰：太微宮後二十五星，郎位也。

懷檄陳寔傳五十二

中常侍侯覽託潁川太守高倫用吏，倫教署爲文學掾。功曹陳寔知非其人，懷檄請見。

注云：檄，板書，謂以高倫之教書之於檄，而懷之者，懼洩事也。

尤無狀者肅宗紀建初元年，前漢東方朔傳注。

詔刺史明加督察，尤無狀者。

注云：無狀，謂其罪惡尤大，其狀無可寄言，故云無狀。它皆類此。前書：館陶公主徒跣頓首謝曰：妾無狀。

師古曰：狀，形貌也。無狀，猶言無顏面以見人也。一曰：自言所行醜惡無善狀也。

斗食小吏肅宗紀

注云前書曰百石以下有斗食佐吏之秩言小吏也。

方目紗肅宗紀

詔齊相省冰紈方空縠吹綸絮。

注云紈素也冰言色鮮潔如冰釋名曰縠紗也方空者紗薄如空也或云孔也即今之方目紗也前書齊有三服官故詔齊相罷之。

鈗鑽肅宗紀

元和元年詔曰自往者大獄已來掠考多酷鈗鑽之屬慘苦無極。

注云大獄謂楚王英等事也鈗其廉反說文曰鈗鉞也國語曰中刑用鑽鑿皆謂酷慘其肌膚也。

汴渠顯宗紀

永平十二年遣將作謁者王吳修汴渠自滎陽至於千乘海口。

注云汴渠即葭蕩渠也汴自滎陽首受河所謂石門在滎陽山北一里過汴已東積石為隄亦號金

隄成帝陽嘉中所作也。

大酺禁羣飲顯宗紀永平十五年

令天下大酺五日。

注云前書音義曰漢律三人已上無故羣飲罰金四兩今恩詔橫賜得令聚會飲食五日酺布也言

天子布恩於天下

三老顯宗紀

詔賜天下男子爵人一級。三老、孝弟、力田人三級。

注云：前書音義曰：男子者，謂戶內之長也。人賜爵者，有罪得贖，貧者得賣與人。三老、孝弟、力田三者，皆鄉官之名。三老，高帝置。孝弟、力田，高后置。所以勸導鄉里，助成風化也。文帝詔曰：孝弟、天下之順也。力田，爲生之本也。三老，衆人之師也。其以戶口率置員。

白馬羌光武紀

建武十三年，廣漢徼外白馬羌豪率種人內屬。

注云：廣漢，今益州雒縣也。羌有百五十四種。在廣漢西北者爲白馬羌也。

三韓東夷傳七十五

東夷有三韓。一曰馬韓，二曰辰韓，三曰弁韓。馬韓在西，有五十四國。其北與樂浪，南與倭接。辰韓在東，十有二國。其北與濊貊接。弁韓在辰韓之南，亦十有二國。凡七十八國。百濟是其一國焉。大者萬餘戶，小者數千家。各在山海間，地方四千餘里。

太白杜篤傳七十

注云：太白，天之將軍。

初作壽陵。光武紀

建武二十六年初作壽陵。

注云初作陵未有名故號壽陵蓋取久長之義也漢自文帝以後皆預作陵今循舊制也

徙函谷關。光武紀

注云函谷谷名因谷以名關舊在宏農湖城縣西前書楊僕爲樓船將軍有功恥居關外武帝乃徙於新安故關在今洛州新安縣之東

褒斜。順帝紀

注云褒斜漢中谷名南谷名褒北谷名斜首尾七百里

軍假吏。山阻用材官。光武紀

建武七年詔曰今國有衆軍並多精勇宜且罷輕車騎士材官樓船士及軍假吏

注云漢官儀曰高祖命天下郡國選能引關蹶張材力武猛者以爲輕車騎士材官樓船常以秋後講肄課試各有員數平地用車騎山阻用材官水泉用樓船軍假吏謂軍中權置吏也今悉罷之

幘。光武紀

注云漢官儀曰幘者古之卑賤不冠者之所服也方言曰覆髻謂之幘或謂之承露

豪傑英俊。光武紀 崔駰傳

注云淮南子曰智過百人謂之豪白虎通云賢過萬人曰傑

注云文子曰智過萬人謂之英千人謂之俊

司隸光武紀

注云前書曰司隸校尉本周官武帝初置持節從中都官徒千二百人督大姦猾後罷其兵察三輔

三河宏農秩比二千石音義云以掌徒隸而巡察故曰司隸

穀皮綃頭周黨傳七十三 向栩傳七十

周黨被徵不得已乃著短布單衣穀皮綃頭待見尙書

注云以穀樹皮爲綃頭也服此尙書以待見也

向栩性卓詭不倫恆讀老子狀如學道又似狂生好被髮著絳綃頭

注云說文綃生絲也從糸肖聲音消案此字當作幪此消反其字從巾古詩云少年見羅敷脫巾著

幪頭鄭元注儀禮云如今著幪頭自項中而前交額上卻繞髻也

內學方術傳序七十二

自王莽矯用符命及光武尤信讖言自是習爲內學尙奇文貴異數不乏於時矣

注云內學謂圖讖之書也其事祕密故稱內

謁太山請命許曼傳七十二下

許峻少嘗篤病三年不愈乃謁太山請命。

注云太山主人生死故謂請命也。

思遲直士肅宗紀建初五年。

詔朕思遲直士側席異聞。

注云遲猶希望也持二反側席謂不正坐所以待其賢良也。

三屬肅宗紀元和元年。

詔曰往者妖言大獄所及廣遠一人犯罪禁至三屬。

注云三屬卽三族也謂父族母族妻族。

葶甲肅宗紀。

方春生養萬物葶甲。

注云葶葉裏白皮也易曰百果甲拆。

兩漢博聞卷第十二

物色。錯愕。寒朗傳三十一。

注云。物色。謂形狀也。錯愕。猶倉卒也。錯。七故反。愕。五故反。

貫行。東平憲王蒼傳三十二。前漢谷永傳附。

光武營建陵地。詔曰。無爲山陵。陂池。裁令流水而已。孝明皇帝。大孝無違。奉承貫行。

注云。貫行。謂一皆遵奉也。谷永曰。一以貫行。固執無違。

谷永傳云。以次貫行。固執無違。

師古曰。貫。聯續也。謂永所陳衆條諸事宜。次第相續。行之不當。更違異也。

太白經天。廣陵恩王荆傳三十二。

太白前出西方。至午。兵當起。

注云。洪範五行傳云。太白。少陰之星。以巳未爲界。不得經天而行。經天爲不臣。今至午。是爲經天也。

款段馬。馬援傳十四。

注云。款。猶緩也。言形段遲緩也。

試守。

朱勃未二十右扶風請試守渭城宰。

注云試守者試守一歲乃爲真食其全俸。

麤糲侯湛傳十六

注云麤糲米也。九章算術曰粟五斗糲率三斗一斛粟得六斗米爲糲也。

眩瞽韋彪傳十六

注云眩風疾也。瞽亂也。謂視不明之貌也。眩音縣。瞽七遘反。

髻髮伏湛傳十六

髻髮厲志白首不衰。

注云埤蒼曰髻髦也。髻髮謂童子垂髮。

正印文馬援傳十四

注云東觀記曰馬援上書臣所假伏波將軍印書伏字犬外嚮城皋令印皋字爲白下羊丞印四下羊尉印白下人人下羊卽一縣長吏印文不同恐天下不正者多符印所以爲信也所宜齊同薦曉古文字者事下大司空正郡國印章奏可。

頭山馬援傳

注云頭山山名也。在今辰州流陵東。武陵記曰此山頭與東海方壺山相似。神仙多所游集。因名壺。

頭山也。山邊有石窟，卽馬援所穿室，以避炎氣也。室內有蛇如百斛船，大云是援之餘靈也。

蒼布馬援傳

公孫述爲馬援制都布單衣

注云：東觀記曰：都作蒼。前書音義曰：蒼布，白疊布也。

椒風班固傳三十上 前漢董賢傳附

注云：桓譚新論曰：董賢女弟爲昭儀，居舍號曰椒風。

召賢女弟爲昭儀，位次皇后，更名其舍爲椒風，以配椒房。

師古曰：皇后殿稱椒房，欲配其名，故云椒風。

昭陽殿班固傳

注云：昭陽殿，成帝趙昭儀所居也。

泰紫班固傳

西都賦云：放泰紫之圓方。

注云：放，象也。泰紫，謂泰微紫宮也。劉向七略曰：明堂之制，內有太室，象紫宮，南出，明堂象太微。春秋

合誠圖曰：太微，其星十二，四方。史記天官書曰：環之扞衛十二星，藩臣皆曰紫宮，是太微方而紫宮

圓也。

避第。皇甫規傳五十五。

皇甫規自以連在大位，欲退身避第。

注云：言欲歸第，避仕宦之塗也。

帷幄。

注云：在旁曰帷，在上曰幄。

檢柙。仲長統傳三十九。

中世之選三公也，務於清整謹慎，循常習故者，是婦女之檢柙，鄉曲之常人耳。惡足以居斯位邪。

注云：檢柙猶規矩。

狙詐。黨錮傳序五十七。

霸德既衰，狙詐萌起。

注云：霸德衰，謂六國時也。狙，七余反。廣雅曰：狙，彌猴也。以其多詐，故比之也。

叔末。黨錮傳序。

叔末澆訛，王道陵缺。

注云：叔末，猶季世也。

寔傳四十二。

聖人執權、遭時定制、步驟之差、各有云設。

注云：權，謂變也。遭遇其時，而定法制，不循於舊也。

兼金 張衡傳四十九

注云：兼金，價倍於惡者，故曰兼金。

邪揄 王霸傳十

王郎起，光武在薊，郎移檄購光武，光武令王霸至市中募人，將以擊郎，市人皆大笑，舉手邪揄之。

注云：說文曰：歐，厭手相笑。歐，戈支反。厭，音踰，或音由。此云邪揄，語輕重不同。

強項 楊震傳四十四

注云：強項，言不低屈也。

悽悽 楊賜傳四十四

不盡其悽悽之心。

注云：悽悽，猶勤勤也。悽，力侯反。

壽冢 侯覽傳六十八

注云：生而自爲冢爲壽冢。

抵罪 南匈奴傳六十八

中郎將張修與單于不相能，修擅斬之，更立右賢王羌渠爲單于，修以不先請。

調穀蓋勳傳四十八。

蓋勳爲漢陽太守，調穀以廩飢人。

注云：調猶發也。

嗇夫城陽恭王傳四 百官志二十八。

光武十八年立考侯康侯廟，比園陵置嗇夫。

注云：嗇夫本鄉官，主知賦役多少，平其差品，園陵置之，知祭祀徵求諸事。注云：風俗通曰：嗇者，省也。

夫賦也，言消息百姓，均其役賦。

平署李膺傳五十七。

李膺等遭黨事，當考實案經三府，太尉陳蕃卻之曰：今所考案皆海內人譽，憂國忠公之臣，此等猶將

十世宥也，豈有罪名不章而致收掠者乎？不肯平署。

注云：平署猶連署。

比門夏馥傳五十七。

夏馥行質直，同縣高氏蔡氏並皆富植，郡人畏而事之，唯馥比門不與交通。

注云：比門猶並門也。

版蕩董卓傳論六十二

版蕩之篇於焉而極

注云詩曰上帝版版下民卒瘁注云版反也瘁病也言厲王為政反先王之道民盡病也又蕩之什曰蕩蕩上帝下民之辟注云蕩蕩法度廢壞之貌也

九市班固傳三十一

注云長安九市其六在道西三在道東

山西鄭興傳二十六

注云山西謂陝山已西也

門士郭太傳五十八

庾乘少給事縣庭為門士

注云門士即門卒也

太駟郭太傳

段干木晉國之太駟

注云說文曰駟儻也謂合兩家之賣買如今之度市也駟子朗反

題目許劭傳五十八

許劭少峻名節，好人倫，多所賞識。曹操微時，嘗卑辭厚禮求爲己目，邵鄙其人而不對。操乃伺隙脅劭，劭不得已曰：「君清平之姦賊，亂世之英雄。」操大悅而去。

注云：己目者，令品藻爲題目。

琴操 曹襄傳二十五

注云：操猶曲也。劉向別錄曰：君子因雅琴之適，故從容以致思焉。其道閉塞悲愁，而作者名其曲曰操。言遇災害不失其操也。紂爲象筮，箕子諫不聽，乃佯狂爲奴，隱而鼓琴以自悲，故傳之曰箕子操。

園邑 梁陳傳二十四

注云：文帝卽位，追尊薄太后父爲靈文侯，會稽郡置園邑三百家。

綺疎 梁冀傳二十四

窗牖皆綺疎青瑣。

注云：牖，小窗也。綺疎，謂鏤爲綺文。青瑣，謂刻爲瑣文，而以青飾之也。

飛梁 梁冀傳

注云：架虛爲橋，若飛也。

洞戶 梁冀傳

連房洞戶。

注云洞通也謂相當也

假伯靈臺馬融傳五十一

注云司馬法曰古者武軍三年不興則凱樂凱歌假伯靈臺荅人之勞告不興也假休也伯師節也靈臺望氣之臺也

亡命王常傳五

王常舞陽人也王莽末為弟執仇亡命江夏

注云命者名也言背其名籍而逃亡也

刊章孔融傳六十

山陽張儉為中常侍侯覽所怨覽為刊章下州郡以名捕儉

注云刊削也謂削去告人姓名

郵置郭太傳五十八

注云說文曰郵境上傳書舍也廣雅曰郵驛也置亦驛也風俗通曰漢改郵為置置者度其遠近之間置之也

隸名孔融傳

孔融為將作大匠遷少府每朝會訪對融輒引正定議公卿大夫皆隸名而已

注云說文云隸附著

隱几孔融傳

注云隱憑也

直指孔融傳

孔融曰馬日磾以上公之尊乘髦節之使銜命直指甯輯東夏

注云直指無屈撓也前書有繡衣直指輯和也

臘賜何敞傳三十三

何敞曰臘賜自郎官以上公卿王侯以下至於空竭帑藏損耗國資

注云臘賜大將軍三公錢各二十萬牛肉二百斤粳米二百斛特進侯十五萬卿十萬校尉五萬尙

書三萬侍中將大夫各二萬千石六百石各七千虎賁羽林郎二人共三千以爲祀門戶直

五湖馮衍傳十八下

注云越絕書曰太湖周三萬六千頃虞翻云太湖有五道故謂之五湖隔湖洮湖射湖貴湖及太湖

爲五湖並太湖之小支俱連太湖故太湖兼得五湖之名在今湖州東也

浩聲馬援傳十四

注云浩聲音告門縣名屬金城郡浩水名也聲者水流夾山間兩岸深若門也詩曰鳧鷖在聲亦其

義也。今俗呼此水爲閤門河。蓋疾言之耳。

駱驛不絕。郭伋傳二十一。

注云。駱驛。連續也。

優復。杜詩傳二十一。

杜詩上疏曰。今若使公卿郡守出於軍壘。則將帥自厲。士卒之復。比於宿衛。則戎士自百。

注云。復。謂優寬也。音福。續漢志曰。羽林郎秩比三百石。掌侍從宿衛。言士卒得比於郎。則人百其勇。

麟藉。廉范傳二十一。

虜自相麟藉。死者千餘人。

注云。麟。轆也。藉。相蹈藉也。

典負。樊鄴傳二十二。

河南縣亡失官錢。典負者坐死。

注云。典。謂主典。負。謂欠負。

二祖四宗。肅宗紀元和二年。

詔祠二祖四宗。

注云。二祖。謂高祖。世祖。四宗。謂文帝爲太宗。武帝爲世宗。宣帝爲中宗。明帝爲顯宗。

釜鷺和帝紀永元五年

注云鷺音尋。方言曰。飢自關而東謂之鷺。

平民傷帝紀

貪苛慘毒延及平民。

注云平民謂善人也。書曰延于平人。

伏閉和帝紀

永元六年六月己酉初令伏閉盡日。

注云漢官舊儀曰伏日萬鬼行故盡日閉不干他事。

燈道班固傳三十上

西都賦云彌明光而絙長樂陵燈道而超西墉。

注云燈道陞級也。

楓棧班固傳

西都賦云上楓棧而棲金雀。

注云楓棧殿堂上最高處也。楓音孤。棧力登反。其上棲金雀。

靈篇班固傳

注云靈篇河洛之書也。

苛細宣乘傳十七

宣乘務舉大綱簡畧苛細。

注云說文曰苛細草也以喻煩雜也。

仞積張讓傳六十八 宣者傳論

靈帝寵任宦官又於西園造萬金堂引司農金錢緡帛仞積其中。

注云仞滿也。

宦者論曰南金和寶冰紈霧縠之積盈仞珍藏。

廢典顯宗紀

注云廢典謂明堂辟雍之禮歷漢不行也。

犀舟勁楫張衡傳四十九

注云前書曰羌戎弓矛之兵器不犀利音義曰今俗謂刀兵利爲犀犀堅也。

鎧馬蔡邕傳五十下

幽冀舊壤鎧馬所出。

注云鎧甲也周禮考工記曰燕無函函亦甲也言幽燕之地家家皆能爲函故無函匠也左傳云冀

之北十馬之所生。

表左。蔡邕傳。

蔡邕曰：謹條宜所施行七事表左。

注云：表左謂陳之於表左，猶今云如左右者。

列將。

西北列將得無解體。

注云：列將謂諸將也。

宰府。

注云：宰府謂三公府也。

右職。蔡邕傳。

注云：右用事之便，謂樞要之官。

卓囊。蔡邕傳。

注云：漢官儀曰：凡章表皆啓封，其言密事得卓囊也。

魁頭露紛。東夷傳七十五。

馬韓人大率皆魁頭露紛。

注云。魁頭、猶科頭也。謂以髮縈繞成科結也。訃音計。

闕達。馬武傳十二。

馬武爲人嗜酒。闕達敢言。

注云。闕達。大度也。敢言。果敢於事無所隱也。

回容。馬武傳。

光武雖制銜功臣。而每能回容。有其小失。

注云。回容。曲也。曲法以容也。

風星。任文公傳七十二。

任文孫明曉天官風星祕要。

乙夜。雞鳴歌。百官志二十六。

注云。凡中宮漏。夜盡鼓鳴則起。晝盡鍾鳴則息。衛士甲乙檄相傳。甲夜畢。傳乙夜。相傳盡五更。衛士傳言五更未明。三刻後雞鳴。衛士踵丞郎趨殿上臺。不畜宮中雞。汝南出雞鳴。衛士候朱爵門外。專傳雞鳴於宮中。應劭曰。楚歌。今雞鳴歌也。晉太康地道記曰。後漢固始。銅陽公安。細陽四縣衛士。習此曲。於闕下歌之。今雞鳴是也。

賀冬至。禮儀志五。

注云冬至陽氣起君道長故賀夏至陰氣起君道衰故不賀鼓以動衆鍾以止衆故夜漏盡鼓鳴則起晝漏盡鍾鳴則息

杜宇張衡傳四十九 文選左思賦四 前漢楊雄傳五十七上

張衡思玄賦云鼈令殪而尸亡兮取蜀禪而引世

注云鼈令蜀王名也令音靈殪死也禪傳位也引長也楊雄蜀王本紀曰荆人鼈令死其尸流亡隨江水上至成都見蜀王杜宇杜宇立以爲相杜宇號望帝自以德不如鼈令以其國禪之號開明帝下至五代有開明尙始去帝號復稱王也

左思蜀都賦云碧化萋宏之血鳥生杜宇之魄

注云萋宏死於蜀藏其血三年化爲碧杜宇王蜀號曰望帝宇死化爲子規鳥

楊雄反騷云徒恐鸚鵡之將鳴兮顧先百草爲不芳

師古曰離騷云鸚鵡之先鳴兮使夫百草爲不芳雄言終以自沈何惜芳草而憂鸚鵡也鸚字也鸚鵡鳥一名買鏡一名子規一名杜鵑常以立夏鳴鳴則衆芳皆歇鸚大系反鸚音桂鸚字或作鷓亦音題鳩音決鏡音詭

九宮張衡傳四十九

張衡以圖緯虛妄非聖人之法乃上疏曰臣聞聖人明審律歷以定吉凶重之以卜筮雜之以九宮

注云。易乾鑿度曰。太一取其數以行九宮。鄭玄注云。太一者。北辰神名也。下行八卦之宮。每四乃還於中央。中央者。地神之所居。故謂之九宮。天數大分。以陽出。以陰入。陽起於子。陰起於午。是以太一下九宮。從坎宮始。自此而從於坤宮。又自此而從於震宮。又自此而從於巽宮。所以從半也。還息於中央之宮。既又自此而從於乾宮。又自此而從於兌宮。又自此而從於艮宮。又自此而從於離宮。行則周矣。上遊息於太一之星。而反紫宮。行起從坎宮始。終於離宮也。

陽月。馬融傳五十。

注云。爾雅曰。十月爲陽。孫炎注云。純陰用事。嫌於無陽。故以名云。

三家言天。張衡傳。

張衡遷太史令。遂乃研覈陰陽。妙盡璇璣之政。作渾天儀。著靈憲算罔論。言甚詳明。

注云。漢名臣奏曰。蔡邕曰。言天體者有三家。一曰周髀。二曰宣夜。三曰渾天。宣夜之學絕。無師法。周髀術數具存。考驗天狀。多所違失。故史官不用。唯渾天者。近得其情。今史官所用。候臺銅儀。則其法也。靈憲序曰。昔在先王。將步天路。用定靈軌。尋緒本元。先準之於渾儀體。是爲正儀。故靈憲作興。衡集無算罔論。蓋網絡天地而算之。因名焉。

八行。寶章傳十五。

注云。馬融與寶章書曰。孟陵奴來賜書。見手迹。歡喜可量。書雖兩紙。紙八行。行七字。

象鑣，輿服志三十九。

注云：爾雅注曰：鑣，馬勒旁鐵也。皆用象牙，乘輿有之。

五星，蘇竟傳二十上。

注云：五星謂東方歲星、南方熒惑、西方太白、北方辰星、中央鎮星。

懷宮，秩純傳十一。

注云：懷宮，河內縣名，有離宮焉。

雲罕，輿服志上二十九。

法駕前驅，有九旂雲罕。

注云：徐廣曰：旂車有九乘，前史不記形也。武王克紂，百夫荷罕旗以先驅。東京賦曰：雲罕九旂。薛綜

曰：旂旗名。

皮軒，輿服志上。

注云：胡廣曰：皮軒，以虎皮爲軒。郭璞曰：皮軒革車。或曰：卽曲禮：前有士師，則載虎皮。

豹尾，輿服志上。

大駕法駕最後一車，懸豹尾，以前比省中。

注云：薛綜曰：豹尾，侍御史載之。小學漢官篇曰：豹尾過後，罷屯解圍。胡廣曰：施於道路，豹尾之內爲

省中故須過後屯圍乃得解。皆所以戒不虞也。淮南子曰：軍正執豹皮，所以制正其衆。禮記前載虎皮，亦此之類。

一時之功。吳漢傳八。

吳漢說彭寵曰：漁陽上谷突騎，天下所聞也。君何不合二郡精銳，附劉公擊邯鄲。此一時之功也。

注云：一時言不可再遇也。

尼首。高獲傳七十二。

高獲爲人，尼首方面。

注云：尼首，首象尼邱，山中下四方高也。

右姓。郭伋傳二十一。

強宗右姓。

注云：右姓，猶高姓也。

白水爲河。張衡傳四十九。

注云：河圖曰：崑山出五色流水，其白水東南流入中國，名爲河也。

天潢。張衡傳。

思元賦云：乘天潢之汎汎兮，浮雲漢之湯湯。

注云史記曰王良旁有八星絕漢曰天潢雲漢曰天河也。

小靳崔寔傳四十二。

靈帝時開鴻都門。榜賣官爵。是時段熲等有功勤名譽。然皆先輸貨財。而後登公位。崔烈時因傅母入錢五百萬。得為司徒。及拜日。天子臨軒。百僚畢會。帝顧謂親倖曰。悔不小靳。可至千萬。

注云靳。固惜之也。靳或作僞。說文曰。僞。引為價也。一建反。

區種。劉殷傳二十九。

顯宗時。以郡國牛疫。通使區種增耕。

注云。汜勝之書曰。上農區田法。方深各六寸。間相去七寸。一畝三千七百區。丁男女種十畝。至秋收。

區三升粟。畝得百斛。中農區田法。方七寸。深六寸。間相去二尺。一畝千二十七區。丁男女種十畝。秋

收粟。畝得五十一石。下農區田法。方九寸。深六寸。間相去三尺。秋收。畝得二十八石。旱即以水沃之。

行春。崔駰傳四十二。

強起班春。

注云。郡國常以春行縣。勸人農桑。振救乏絕。班布春令也。

桑榆。孟嘗傳六十六。

年歲有訖。桑榆行盡。

注云。謂日將夕。在桑榆間。言晚暮也。

三署郎。

漢官。左右中郎將。皆秦官也。比二千石。三署郎皆屬焉。三署。謂五官署左右署也。

端門。襄楷傳二十下。前漢李尋傳。

襄楷曰。去歲五月。熒惑入太微。犯帝坐。出端門。不軌常道。今年歲星久守太微。逆行西至掖門。還切執法。

注云。天官書曰。太微南四星。中爲端門。軌猶依也。又曰。端門左右星爲掖門。太微南四星爲執法。切。謂迫近也。

前漢書注云。端門。太微正南門。

貪叨。

注云。方言曰。叨。殘也。

苞苴。第五種傳三十一。楊賜傳四十四。

在鄉曲無苞苴之嫌。步朝堂無擇言之闕。

注云。苞苴。饋遺也。

楊賜上封事曰。夫女謁行則讒夫昌。讒夫昌則苞苴通。

黃腸梁商傳二十四

大將軍梁商薨，帝賜以東園朱壽之器，銀鏤黃腸玉匣什物二十八種。

注云：壽器，棺也。以朱飾之，以銀鏤之。前書音義曰：以柏木黃心爲槨，曰黃腸也。

鄭公鄉鄭玄傳二十五

孔融告高密縣爲鄭元特立一鄉，曰昔齊置士鄉，越有君子軍，皆異賢之意。鄭君好學，實懷明德。昔太史公廷尉吳公，謁者僕射鄧公，皆漢之名臣。又南山四皓，有東園公、夏黃公、潛光隱耀，世嘉其高，皆悉稱公。然則公者，仁德之正號，不必三事大夫也。今鄭君鄉，宜曰鄭公鄉。

注云：管仲相桓公，制國爲二十一鄉，工商鄉六，士鄉十五，以居工商士也。吳越相攻，越王句踐乃中分其師爲左右軍，以其私卒君子六千人爲中軍。注云：君子，王所親近有志行者，事並見國語。

公羊墨守鄭玄傳

任城何休好公羊學，遂著公羊墨守。左氏膏肓，穀梁廢疾，鄭元乃發墨守，鍼膏肓，起廢疾。休見而嘆曰：康成入吾室，操吾矛，以伐我乎。

注云：言公羊義理深遠，不可駁難，如墨翟之守城也。說文云：肓，隔也。心下爲膏，喻左氏之疾不可爲也。康成元字也。

顯氣班固傳三十下

西都賦云抗仙掌與承露擢雙立之金莖軼埃壙之混濁鮮顯氣之清英

注云說文云顯白貌音皓

棹卒岑彭傳七

棹卒六萬餘人

注云棹卒持棹行船也

露橈岑彭傳

露橈數千艘

注云爾雅曰檝謂之橈露橈謂露檝在外人在船中

巫蠱和帝陰皇后傳十

挾巫蠱道

注云巫師爲蠱故曰巫蠱左傳注云蠱惑也

讎校和熹鄧皇后傳十

東觀讎校傳記

注云讎對也

侂子和熹鄧皇后傳

太后以陰陽不和軍旅數興詔饗會勿設戲作樂減逐疫侷子之半。

注云侷子逐疫之人也音振薛綜注西京賦云侷之爲言善也善童子也續漢書曰大儺選中黃門子弟年十歲以上十二以下百二十人爲侷子皆赤幘卓製執大鞞。

